

Yeisu Keliso Yana Ivemogatala

Kivemala

Yeisu gilaka gabameya ayo malamala sikisiti tu (62) giavaidi aku Iyoni buki taidei givetokilumina. Tova tayuwe wagaine melala lakaina Loma ani toyogi-moena melala lakaidi matatabuna wagaidiya, ada ebaveimeya moyaidi meLoma iveiveimeyedi. Aku yadi kiniyavo ani ivetumagana vaita badi taudiyavo ani meLoma yadi yaubadayavo, e ada badi kaliva iveiveimeyedi ke ina oduodu wagaidiya. Aku Yeisu anatomuliyayavo veimeya-nai iawaegegena, ivonaga, “Keke maita anagai. Yeisu Keliso ani Banae yama Kauveya, ada Bana gaga wagaine ana oduodu.” Taidei wagaine Loma toveimeyayavo ani inuwakoyo lakai-moena Yeisu anatomuliya wagaidiya ke moyaidi ikiveuloulolonidi (2:10, 2:13, 3:10, 6:9). Badi yadi kini anayegana Nilo kadu muliya yadi kini Domitiyani yadi tova veimeya wagaidiya, Yeisu anatomuliyayavo moyaidi ikiveulouloloni-moedi. E ada Iyoni yana laumamala inogalina wagaine, ivai inauwena ebaियogona imula Patimo wagaine. Imula-nai ani isena badi yogoyogodiyavo gaga yadi miyami faine.

Aku tova-nai Iyoni wadedeku-deya gimiyamiya, anavewala tulina tulina Yeisu giseyegemonedi bana wagaine, e ada Iyoni anavewala-dina giawaluvaluvayedi

yana vetokiluma wagaine ke giimili ginau tovetumaganayavo wagaidiya e ada gina kiveasevatudi. Ada aimo yana vetokilumainai isena yada Buki Tabu wagaine, taide 'Yeisu Keliso Yana Ivemogatala'.

Taidei ivemogatala-nai wagaine Yeisu givewavewaleda vaita nibainavo ani aimo kadu yana tonogalayavo ina kiveuloulolonidi. Aku auwe gilubodadi ina atuvefaila (2:7, 13:10, 14:12), ada kai ialamanena Keliso nibainavo ina luvealikadi, e au ina mididi toyogina (12:11). Iyoni giawamogatalena vaita Yeisu yana yewa-vagila wagaine nibainavo keke tamo yadi toyogina, aku Yaubada ani Natuna Yeisu Keliso wagaine Seitani wa tubuiyanavo ke kadu tomiyababi moyaidi gavega Yaubada ivedomobubusena, ani matatabudi gina toyogisegedi aku Yaubada yana yooyavo gaga ani vemwamwala-vagata ina nuwagana.

Buki anakivemala, ada Iyoni yana vona vesiule ekalesiya adiseveni wagaidiya. (1:1-8)

Iyoni anavewala wagaine Yeisu giifufuyena yana matawa ekalesiya adiseveni faidiya. (1:9 - 3:22)

Tomiya gabama moyaidi Yaubada iawadavada-vana. (4:1-11)

Bana Lami buki uwalugena givaina. (5:1-14)

Ebakivefota adiseveni adiiyavuga. (6:1 - 8:1)

Kaula adiseveni. (8:2 - 11:19)

Gaitoma tulina tulina Iyoni anavewala wagaine giitadi. (12:1 - 14:20)

Ebakivekoyo vita-moedi adiseveni. (15:1 - 16:21)

Melala lakaina Babiloni gibeu. (17:1 - 18:24)

Migabama yadi awadavadava anakweli
Yaubada faine, ada osi kwayakwayana
anatoyage. (19:1-21)

Yaubada Seitani gitoyogisegena ke anave-
matavuloga givelena. (20:1-10)

Yaubada toalika givevonayavugidi. (20:11-15)

Gabama ke babi evagudi, ada Yelusalema eva-
guna. (21:1 - 22:5)

Yeisu yana yewa-vagila. (22:6-17)

Iyoni givonamataweda buki taidei faina.
(22:18-21)

Buki anakivemala.

¹ Taidei ani Yeisu Keliso anaivemogatala
Yaubada givelena ke yana togugaiyavo
gina vewaledi gavana gavana tova kabisona
ina yegemona. Ada Yeisu yana anelose seyana
givewalena ivemogatala-dina faidiya, ada giimili
gielai Iya yana togugai Iyoni wagaikuya. Ada
tova-nai gaitoma tulina tulina gaitadi akuwewala
wagaidiya, ani gikivemaliku faidiya.

² Ada Iya Yaubada yana vona kadu Yeisu
Keliso yana nuwanuwa velemono giawamo-
gatalena, ani gaawatalatalainena. Gaitoma-dina
matatabuna gaitadi velemono, taidei faina gave-
toyetokilumidi.[†]

³ Taidei gaitoma-dina Yeisu giivemogatalidi
ani tova kabisona ina yegemona. Taidei faina
biyavo-dina falofisai taidei ina veyawana yoo
matadiya, ani Yaubada gina awanuwakabubuyedi.
Kaduwe badi gavega falofisai-nai ina nogalina ke

[†] 1:2 Iyo 19:35

ananuwanuwa inavai aseasediya inasena, ani gina awanuwakabubuyedi.

Vona vesiule ekalesiya adiseveni wagaidiya.

4-5 Siule tubuiyakuweyavo imi Yaubada yana yoo wamiyamiya melala adiseveni** Eisiya anafafaliya kaliva-mina. Iya Iyoni taidei yami leta gaimili ginau wagaimiya. Yaubada ke Aluwaluwa adiseveni** ada Yeisu Keliso ani wa yadi nuwadoga ina lemelememi ke ina kikivenuwaniwalovimi. Banae Yaubada malinai gimiyamiya, muliya-yo tova nagona givevuvu aku bademowa-deya gimiyamiya, ada kaduwe aimo gina miyamiya. Badi aluwaluwana adiseveni imiyamiya Yaubada yana veimeya anaebavetoga kaikaiwabuna wadebaine. Banae Yeisu Keliso ani toitavedama idibudibumwaigina ke tovana velemono. Ada Banae tovewainagona Yaubada gisiveyawana alika wagaine† kadu kiniyavo babi taidei wagaine aditoveimeya.†

Yeisu Keliso kana davadavana faina Banae ginuwakabubuyeda, ada dayagina gimadu wagaine

** 1:4-5 Taidei buki-nai Ivemogatala wagaine ani tova ke tova naba-nai adiseveni iinanana, tova fifti-fowa anafaiweya. Buki Tabu wagaine naba-nai seveni ananuwanuwa ani 'iwaka-vagaina' o 'giluyabu-mowa' o 'anamatatubuna'. **

1:4-5 Buki Tabu anatoalamana wagaidiya taide vona-nai 'aluwaluwa adiseveni' ananuwanuwa iluwei. Tufodi inuwanuwa vaita ananuwanuwa seyana ani ina 'anelose adiseveni'. Una itana Ibeliu 1:14, givona vaita anelose ani aluwaluwa, badi Yaubada giimiliimilidi ke tovetumagana ina lemelemedi. Aku tufodi inuwanuwa vaita kadu ananuwanuwa seyana ani ina Aluwaluwa Tabutabuna, Banae iwaka-vagaina. (Ive 4:5) † 1:4-5 Kol 1:18 † 1:4-5 Ive 17:14, 19:16

gietoyavuda yada koyona aditoyogina wagaine-deya.**

⁶ Ada gikilakaida ke giseda yana ehaveimeya anayoo, kadu Yaubada yana veyavo anatovegugai adiivi giveleda† yana Yaubada kadu Tamana faine. E ada tova matatabuna Yeisu Keliso anayegana kana kikilakaina. Banae yana toyogina gimiyamiya-vagata ke vagata. Ika anafaiweya.

⁷ Waitana, Banae gielaelai buibui tabodiya† ada kaliva moyai-moeda kana itana, kadu biyavodina ililina† au ina itana, ada yoo moyaidi fafali tulina tulina babi matatabuna wagaine inatagi donadonau Bana ina itana faina. Vona vele-moena, ika anafaiweya.

⁸ Yaubada Banae yada Kauveya givona,

** **1:4-5** Vona taidei 'dayagina gimadu wagaine gietoyavuda yada koyona aditoyogina wagaine-deya' anaalamana ani giyege-mona Yaubada yana veyavo anawai tuwaina wagaine, wai-nai tuwai-moena gisena. Taidei wai-nai wagaine kevakeva inavai ina luealikadi ke ina vebolavoiyedi kaliva yadi koyona anavenuwaega faine. Kevakeva-dina dayagidi gimadumadu wagaine, yawaidi ivevebolavoiyedi, ada taidei wagaine matavuloga inuwanuwagadi koyona faidiya. Maita taide wagaine Yeisu dayagina gimadumadu ananuwanuwa ani tova-nai bolagalaga wagaine Tauna yawaina givebolavoiyena ide kaliva yada koyona faidiya. (Eba 9:4, Iyeg 12:7,13,22-23, 24:8, 30:10, Lom 5:9, Efes 2:16, Kol 1:20, 1Pi 1:18-19, 1Iyo 1:7) † **1:6** 1Pi 2:9, Ive 5:10, 20:6 † **1:7** Dan 7:13, Mad 16:27, 24:30, Mak 13:26, Luk 21:27, Gug 1:11 † **1:7** Iyo 19:34,37

“Iyayeku ani Alefa** ada Omega.† Malinai Iya gamiyamiya, muliya-yo tova nagona givevuvu aku bademowa-deya gamiyamiya, ada kaduwe aimo Iya gana miyamiya, Totoyogi-vagaiku.”

Iyoni anavewala wagaine Yeisu giitana.

⁹ Iya tubuiyami Iyoni. Iyayeku ada imiyavo ani moyaida kamiyamiya yana ehaveimeya wagaine ani nodi uloulolo kanuwanuwagana anayegana faine ada kaduwe vita iyegeyegemona wa-gaideya, aku auwe Yeisu yana lemeya wa yada atuvefaila kavetoefaefa. Ada Iya Yaubada yana vona ada Yeisu yana valeya gaawawamogatalena faina, ikiveyabiku iseku yogoyogodiyavo yadi fafaliya, taine imula-nai ivewagana Patimo wa-gaine.

¹⁰ E ada gaela gamiyamiya aku Kauveya anaoduodu anayadayada seyana wagaine galu-tovonina Aluwaluwa Tabuna givemagaku, ada ganogalina bonabona lakaina mulikuya vaita kaula anaiyuve ananogala anafaiweya.

¹¹ Ada bonabona-nai givona, “Gavana una itana ani una vetokilumina buki wagaine ada una imili ginanau ekalesiya** adiseveni wagaidiya. Melaladina wagaidiya ekalesiya adiseveni imiyamiya

** **1:8** ‘Alefa’ ani leta wai ginago-moena meGiliki yadi leta matatabuna wagaidiya, ada ‘Omega’ ani leta wai gimuli-moena. Ida Yaubada Tauna anavevewaga seyana giawamogatalena, ada givonaluvelosau vona-dina ‘ehavevuvu’ ke ‘ebalauyabu’ ada kaduwe ‘wai ginagona’ ke ‘wai gimuline’ ani wagaidiya. (Ais 41:4, 44:6) † **1:8** Ive 22:13 ** **1:11** Yaubada yana veyavo anawai evaguna anavetokiluma wagaine, vona-nai ‘ekalesiya’ analamana ani ‘tovetumaganayavo adiyoo’.

ani taidei anafaiweya. Efeso, Simina, Fegamumu, Taiyatila, Sadisi, Filadelifiya ada Leodisiya.” **

¹² Taide anafaiweya bonabona-nai givona e ada gamiyavilaku gada itana gaito givonavona wa-gaikuya ani mayale adiebaibo adiseveni gaitadi, ibubudi gola wagaine.**

¹³ Ada mayale adiebaibo nefanidiya seyana gaito anafaiweya Banae Kaliva Natuna gimiyamiya. Anaveigavu nuya luveyalilina ada beleta gola manawana wagaine gibalawalilivuga.

¹⁴ Aku kuluwana kwayakwaya fofolina vaita buibui kwayakwaya-moedi anafaiweya, ada matana vaita aiyabeyabela meyana anafaiweya.†

¹⁵ Kadu agena ilunamanamaledi vaita kainumu yagoyagona igilana anafaiweya,† ada bonana ananogala vaita wayagata gida lunununuga anafaiweya.†

¹⁶ Nimana aiyatagina wagaine ailabama adiseveni gikiakiabidi, ada awana wagaine benisi wa fafali lugana manimaninidi giyegemona.† Magigina yana malina gilunamanamalena vaita kauwana givugivudeya

** **1:11** Vona-nai ‘ekalesiya adiseveni’ ananuwanuwa ani ‘ekalesiya matatabudi’. (1:4-5 ke anaailabama adiebakivemala) E ada taide leta-dina ani Yaubada yana yoo moyaidi faidiya, badi imiyamiya Eisiya anafafali lakaina wagaine. Anafaiweya Kolose wagaine, Iyelafolesi wagaine, Tolowasi wagaine, ada kai ekalesiya tufodi keke kada alamanedi. (Kol 1:2, 4:13, Gug 20:5, 2Kol 2:12)

** **1:12** Gola-nai mayale adiebaibo wagaidiya ani giveiyaiyaya vaita wada Yaubada yana lokoloko ada kaduwe yegayega-vagaidi. † **1:14** Ive 2:18, 19:12-13, 22:13 † **1:15** Dan 10:6 † **1:15** Isik 43:2, Ive 14:2, 19:6 † **1:16** Efes 6:17, Ibel 4:12, Ive 19:15,21

yana malina anafaiweya.

¹⁷ Aku tova-nai gaitana, gabeu agene vaita Iya alialikaku anafaiweya. Ada nimana aiyatagina gisena wagaikuya aku givona, “Keke una matauta. Iya ani wai ganago-moena ada wai gamulimoena.[†]

¹⁸ Iyayeku miyamiyani-vagaiku. Iya nagona gaalika e aku au uitana, malinai gamiyamiya, ada ganamiya-vagata. Iyayeku ani Aliku kadu Toalika Yadi Fafali anatoveimeya.

¹⁹ Taidei faina gaitoma-dina uitaitadi, tainei una vetokilumidi. Taidei gaitoma-dina tufodi iyegeyegemona malinai, aku tufodi aimo ina yegemona.

²⁰ Aku ailabama adiseveni uitadi nimaku aiyatagiku wagaine ada mayale adiebaibo adiseveni ibubudi gola wagaine, ani adialamana sewase-wavuyena taidei anafaiweya. Mayale adiebaibo adiseveni ani ekalesiya adiseveni, aku ailabama adiseveni ani badi tonagona-dina^{**} adiseveni

[†] **1:17** Ive 1:8 ke anaailabama adiebakivemala, 2:8 **** 1:20**
 Vona Giliki wagaine vona-nai ‘angelos’ kakivilana ‘tonagona’ ani ananuwanuwa ‘tomatawa’. Kai kana inanana gabama anatomatawa giyegeyemona Yaubada wagaine-deya aga kana vewagana ‘anelose’. Aku kai kana inanana ‘tomatawa’ banae kaliva aga kana vewagana ‘tomatawa’. Anafaiweya Luke 7:24 wagaine, vona-nai ‘tomatawa’ vona Giliki wagaine ani ‘angelos’. Tuwai-moena meIsileli yadi manuwa vewala wagaidiya ani kwana Isileli seyana gina vetonagona biyavo-dina wagaidiya, badi wadedeku-deya ivagavagauta. Ginagonagoyedi veoveola wagaine, ada kaduwe givetonagona yadi melala anayeganeya Yaubada matane. Taidei tonagona-nai ani ivewagana ‘valeya anatomatawa ekalesiya faidiya’. E ada vona-nai ‘anelose’ ani ananuwanuwa iluwei imiyamiya.

ekalesiya-dina iitaitaveyabidi.”

2

Matawa melala Efeso tovetumagana adiyoo faidiya.

¹ Kaduwe givoneku, givona, “Banae tonagona-nai Yaubada yana yoo Efeso^{**} wagaine gitaitaveyabidi ani bana wagaine una vetokiluma taide anafaiweya, unavona, ‘Banae-nai nimana aiyatagine ailabama adiseveni gikiveyabidi ada mayale adiebaibo adiseveni ibubudi gola wagaine nefanidiya ginudadana ani yana vona taidei anafaiweya.

² Yami dewa ani matatabuna gaalamanena. Imiyavo velemono wafaifaisewa toyogina. Ada vita aimo wanuwanuwagadi, aku auwe wa yami atuvefaila wamidimididi toyogina. Ada gaalamanena badi koyodiyavo ani keke maita nuwanuwami badi nodi wana luluveya. Ada badi igaveuveula ke ivona vaita badi afositolo aku keke velemono, ani bade-mowa waitavenuwadadanedi ada waitanuwa-gana badiyavo tofewayafwaya.[†]

^{**} **2:1** Efeso ani bana melala lakaina seyana Loma yana ebaveimeya Eisiya wagaine. Anataliya waka ivemaga-vagaina, yadi ebakimone iwaka-moena, aku meEfeso ioduodu bana yaubada fwayafwaya anayegana Atemisi wagaine. (Gug 19:27,35) Melala-nai Efeso ani tova maufona wagaine givefafali lakaina Yeisu anatovetumagana yadi ebafaisewa faina. E ada meyameyaganina ekalesiya-nai Efeso wagaine ani ekalesiya lakai-moena Loma yana ebaveimeya wagaine. [†] **2:2** 1Iyo 4:1, 2Iyo 1:7-11

³ Kaduwe gaalamanena vita moyaina iyege-mona wagaimiya akuyegana wawaiwaina faina, aku keke wada kabekabebe yami vetumagana wagaine. Au wa yami atuvefaila tova moyaina wakwageyena.

⁴ Ee, taidei yami dewa-dina ani iwakadi, aku dewa seyana ani ganuwanuwa lakaina faine ada matakuya keke iwakana. Nag-ona wanuwakabubuyeku lakaina, aku malinai keke wada nuwakabubuyeku nagona anafai-weya.

⁵ Taidei faina wana itaveyabimi ada wana nuwaududuna gavaiyamu tuwaina wadewadewa wagaikuya. Faina malinai anaita imi velemonoena bademowa wabeu. E ada wana nuwawilana. Tova nagona wanuwanuwa Iya faikuya ke wanuwanuwakabubuyeku, ani malinai kaduwe anafaiweya wana dewadewa. Kai keke wana nuwawilami yami koyona wagaidiya, aga Iya ganaela yami mayale anaebaibo gana vaiyavulena yana ebamiya wagaine, e ada wanamiya-kavovo.

⁶ Aku yami dewa seyana iwakana matakuya ani, badi Nikolasi yana yoo yadi gugai koyodi ani wadibusoyoge-moedi, gugai-dina Iya kaduwe gadibusoyoge-moedi.

⁷ Imi gavega wa tagami ani wada nogala gavana Aluwaluwa Tabuna givonavona ekale-siya adiseveni wagaidiya. Badi Iya faikuya ina vetoyogina† ani Iya adiawaega gana veledi ke yawai ana ai† guwaguwa ina kanina. Ainai gimidimididi Yaubada yana fafali iwaka-

† 2:7 Ive 3:5, 21:7 † 2:7 Eba 2:9

vagina gabameya ivewagana Paladaisi.' ”

Matawa melala Simina tovetumagana adiyoo faidiya.

⁸ Kaduwe givoneku, givona, “Banae tonagona-nai Yaubada yana yoo Simina wagaine giitaitaveyabidi, ani bana wagaine una vetokiluma taide anafaiweya, unavona, ‘Banae-nai wai ginago-moena ada wai gimulimoena, gialika ada giyewana wayawaina ani yana vona taidei anafaiweya.

⁹ Iya wamulimuliyeku faina, vita lakaina wanuwawanuwagadi ada wavefanifani ani gaalamanena. Aku Yaubada matane imi kaikaiwabumiyavo. Kaduwe gaalamanena kaliva tufodi ani ivefwayafwaya ivonavona badiyavo ani Yaubada yana yoo meIsileli, ada nuwanuwadi amiyegana ina kikivekoyodi e ada iveveloi-kavokavovomi. Biyavo-dina ani keke meIsileli aku velemoena badi Seitani yana yoo.

¹⁰ Keke maita wana matauta uloulolo-dina tova kabisona inaelai wagaimiya. Wana itana, aimo Seitani, banae toveloi-kavokavovo ani tufomi ginase mi manuwa ebayogona wagaine e ada yami vetumagana gina galuvaluvana, ada wana uloulolo yadayada teni wagaidiya.† Aku tova moyaina wa yami aseawaega Yaubada wagaine wana miyamiya analaba wana alika, ada yami vetoyogina faina fatami ani yawai-vagata gana vele mi, tainei vaita tovewainagona anakedukedu kaikaiwabuna† anafaiweya.

† 2:10 2Tim 4:8, Iyem 1:12 † 2:10 2Tim 4:8, Iyem 1:12

¹¹ Imi gavega wa tagami ani wada nogala gavana Aluwaluwa Tabuna givonavona ekalesiya adiseveni wagaidiya. Badiyavo Iya faikuya ina vetoyogina ani keke-bamowa ina gilagi alika anavelu[†] wagaine.’ ”

Matawa melala Fegamumu tovetumagana adiyoo faidiya.

¹² Kaduwe givoneku, givona, “Banae tonagona-nai Yaubada yana yoo Fegamumu wagaine gitaitaveyabidi, ani bana wagaine una vetokiluma taide anafaiweya, unavona, ‘Banae-nai awana wagaine benisi wa fafali lugana manimaninidi[†] giyegemona ani yana vona taidei anafaiweya.

¹³ Gaalamanena yami melala-nai wagaine wamiyamiya, wadedeku Seitani giveiveimeya yana veimeya anaebavetoga wagaine-deya. E aku aimo wamiyaveyalata velemonoena wagaikuya ada yami vetumagana wagaikuya keke wada veweye. Ee, tuwaina yaku kaliva Enitipasi, banae tova moyaina wa yana idibumwaiga giawatalatalaina faikuya ani iluvealikana amimwatuguya. Ada au yami melala-nai wagaine Seitani anayegana ani lakaina kadu tubuiyami iluvealikana akuyegana faina, aku imiyavo ani yami vetumagana keke wada veweye.

¹⁴ Ee, taidei yami dewa-nai ani iwakana, aku dewa seyana ganuwanuwa lakaina faine ada matakuya keke iwakana. Faina kaliva

[†] 2:11 Ive 20:14, 21:8 [†] 2:12 Ibel 4:12, Ive 1:16

tufodi wagaimiya-deya ani Belami† yana dewa imuliyena. Wana nuwenuwena. Bana Belami ani Balaki givewalena ke koyona anaebabe ginasena meIsileli wadebaidiya, e ada gina nuvuyoyedi ke koyona wagaine inabeu. Ina Belami ginagoyedi ke aa-dina mali kaliva bade ivebolavoiyedi yadi yaubada fwayafwaya adikilumina wagaidiya ani ikanidi,† ada kaduwe ginagoyedi ke taudiyavo iawaegedi vovo anaawaege-kavokavovo wagaine.†

15 Kadu anafaiweya kaliva tufodi amimwatuguya ani badi Nikolasi ke yana yoo yadi vewala balana imuliyena.

16 Taidei faina wana nuwawilana taine wai-dina koyodi wagaidiya. Kai keke wana nuwavila, aga tova kabisona ganaelai wagaimiya ada badiyavo taide vewala-dina baladi imulimuliyedi, ani gana lugaviyadi benisina wagaine giyegeyegemona awakuya.**

17 Imi gavega wa tagami ani wada nogala gavana Aluwaluwa Tabuna givonavona ekalesiya adiseveni wagaidiya. Badi Iya faikuya ina vetoyogina ani mana† tufona gana veledi, taine gabama ana aana sewasewavuyena. Ada kadu kabala kwayakwayana gana veleni seyana seyana, kabala-nai wa yeganina evaguna ivetokilumina

† 2:14 Naba 25:1-9, 31:16, 2Pi 2:15-16 † 2:14 Gug 15:29, 1Kol 8:10 † 2:14 Naba 25:1-3, 1Kol 10:6-8 ** 2:16 Iyoni 12:48, wadedeku Yeisu Tauna yana vona faidiya giifuifufu, vona-dina vaita tovevonayavuga gimiyamiya todibusoyoga faidiya. Kaduwe una itana ailabama adiebakivemala Ivemogatala 1:16 wagaine.
† 2:17 Iyeg 16:15-35, Iyo 6:48-50

wagaina. Yegana-nai ani keke tamo gaito gina alamane aku banae-nai gina nuwagana.† Tauna gagana gina alamanena.’”

Matawa melala Taiyatila tovetumagana adiyoo faidiya.

¹⁸ Kaduwe givona wagaikuya, givona, “Banae tonagona-nai Yaubada yana yoo Taiyatila wagaine giitaitaveyabidi, ani bana wagaine una vetokiluma taide anafaiweya, unavona, ‘Yaubada Natuna, Bana matana vaita aiyabeyabela meyana anafaiweya ada akena ilunamanamalena vaita kainumu yagoyagona igilana anafaiweya,† ani yana vona taidei anafaiweya.

¹⁹ Yami dewa ani matatabuna gaalamanena. Gaalamanena wanuwakabubuyeku ke kaduwe kaliva wanuwakabubuyedi, ada wavetumagana wagaikuya. Kaduwe gaalamanena tova moyaina kaliva walemelemedi, ada wa yami atufefaila amivita wawaiwaidi aku wamidimididi toyogina. Gaalamanena vaita nagona taidei dewa-dina wadewadewayedi, e aku malina ani au wadewadewaye-moedi. Taidei iwaka-moena.

²⁰ Ee, taidei yami dewa-dina ani iwakadi, aku dewa seyana ganuwanuwa lakaina faine ada matakuya keke iwakana. Ina

† 2:17 Ive 3:12 † 2:18 Ive 1:14-15

vavine-dina adiyegana Yesibela,** badi taudi ivewagadi Yaubada yana falofita seyana ani waalamanena yadi dewa aku au waitamoedi. Keke maita wada awatadi. Aku badi yadi vewala fwayafwaya wagaine yaku togugaiyavo inunuvuyoyedi, e ada vovodi iawaega-kavokavovoyedi, kadu ikanikani yaubada fwayafwaya adikilumina adiaa-dina kaliva ivebolavoiyena wagaidiya.

²¹ Badi gavonedi vaita ida nuwavilana, ada gaboda faidiya e ada aseasedi ida sevedavedamadi ke ida nuwaviladi vovodi anaawaega-kavokavovo wagaidiya-deya, aku keke nuwanuwadi ina sevedavedama.

²² E ada wana itana, veoga vita-moena gana veledi. Ada badi kaliva-dina nodi iudoudo ani kai keke ina nuwavila vavine-dina yadi dewa koyona igugugaiyedi wagaine, aga gana segedi ina uloulolo lakai-moena.

²³ Ada vavine-dina anatomuliyayavo gana munudi ina alika. E ada tovetumaganayavo fafali moyaina wagaidiya ina alamanena Iya idogamekuna asease ada nuwanuwa aditoalamana, ada imi seyana seyana gana fatami anafaiweya yami gugai adilauboda wagaine, kai

** **2:20** Vavine taidei ani adiyegana 'Yesibela' Yeisu giveyegana, ada taide wagaine givonaluvefosau tova tuwaina-moena anavavine-dina adiyegana Yesibela. Tuwai-moena malamala seveni analedi (700) anafaiweya muliya-yo Yeisu yana tova miya babiya ani badi vavine-dina imiyamiya. Ada yadi dewa koyo-moena, anafaiweya yaubada fwayafwaya adikilumina wagaidiya ioduodu, ada Yaubada yana falofitayavo ivenibainedi veleemoena. Badi mine-dina ifuifufudi ani kana nuwagana 1 Kini daba 16 ke ginau daba 21 wagaine, ada 2 Kini 9:7-10.

iwakana wagaine o kai koyona wagaine.†

24 'Aku imi velugamiyavo Taiyatila wagaine, ani keke badi yadi vewala-nai wada vetumagane kadu vewala-nai ivewagana 'Seitani yana nuwanuwa ikavuya' ani keke anaalamana wadavai. E ada keke tamo kadu veimeya vitana gana velemini.

25 Aku au amivewala iwakana bade wavaina ke yami dewa yegayegadi ani wana abidonedini analaba ganaelai.

26 Badi Iya faikuya ina vetoyogina ada yaku nuwanuwa ina mulimuliyedi ke ina naunauwena yawaidi adiebalauyabu wagaine, ani toveimeya anaveimeya gana veledi e ada ina veiveimeya babi anakaliva adiyoo moyaidi wagaidiya.

27 Ada yadi veimeya kaliva wagaidiya ani toyogina velemonoena. Ee, kaliva koyodiyavo yadi toyogina ina toyogisegedi vaita kaliva welamowa giyavali giamukumukuna anafaiweya. Iya Kamaku wagaine-deya akuveimeya gavaina vetoveimeya faina, e ada au anafaiweya toveimeya adiveimeya gana veleni badi wagaidiya.

28 Ada kaduwe gana veledi malalavuga anaailabama.

29 'Imi gavega wa tagami ani wada nogala gavana Aluwaluwa Tabuna givonavona ekalesiya adiseveni wagaidiya.' "

3

Matawa melala Sadisi tovetumagana adiyoo faidiya.

† 2:23 Mad 16:27

¹ Kaduwe Keliso givoneku, givona, “Banae tonagona-nai Yaubada yana yoo Sadisi wagaine giitaitaveyabidi ani bana wagaine una vetokiluma taide anafaiweya, unavona, ‘Banae-nai Yaubada Aluwaluwana adiseveni imiyamiya wagaine kadu ailabama adiseveni gikiabidi ani yana vona taidei anafaiweya.

Yami dewa ani matatabuna gaalamanena. Imi valeyami ani vaita yami vetumagana toyo-gina kaliva matadiya, aku velemonoena yami vetumagana-nai ani kabekabebe-moena, au vaita bademowa gialika anafaiweya.†

² Wana mididi dau wagaine ada wana itaita, ada yami vetumagana kabisona gitufo aku kabisona gina avovolina, ani wana kivetoyogina. Faina gaitanuwigana yami dewa ani keke iwakana Kamaku Yaubada matane.

³ E ada keke nuwami ginavulu vewala-nai ivewalemi ada wanogalina. Au wana moinena ke wana nuwavilami. Kai keke yami dauya-deya wana mididi, ganaelai wagaimiya vaita tokiyafu anafaiweya. Gavatoveya tokiyafu gina yegemo ikavuya ani keke wada alamane, ada kadu anafaiweya Iya ganaelai.†

⁴ Aku imi meSadisi wagaimiya ani kaliva tufodi keke ida awaegedi dewa koyona wagaidiya e ada adikaleko keke ida vebwanenedi.† Taidei faina adifaiweya kaleko kwayakwayana ina osedi ada Iya nodi ana nunudadana, faina badiyavo yegayegadiyavo e ada adilauboda.

† 3:1 1Tim 5:6 † 3:3 Mad 24:43-44, Luk 12:39-40, 1Tes 5:2 † 3:4 Iyud 23

⁵ Ada kadu anafaiweya, gavega Iya faikuya ina vetoyogina ani kaleko kwayakwayana gana veledi ke ina osedi. Ada adiyegana kekebamowa gana vovoli Yawai anaBuki** wagaine, ada gana awamogataledi Kamaku matane ke yana aneloseyavo matadiya ganavona, “Badiyavo ani Iya yaku kalivayavo.”†

⁶ Imi gavega wa tagami ani wada nogala gavana Aluwaluwa Tabuna givonavona ekalesiya adiseveni wagaidiya.’ ”

Matawa melala Filadelifiya tovetumagana adiyoo faidiya.

⁷ Kaduwe Keliso givoneku, givona, “Banae tonagona-nai Yaubada yana yoo Filadelifiya wagaine giitaitaveyabidi, ani bana wagaine una vetokiluma taide anafaiweya, unavona, ‘Banae-nai tabu kadu yana nuwanuwa matatabuna yegayega-vagaidi ada Banae vona velemoena ani taidei yana vona. Tova tuwai-moena Kini Deivida giveiveimeya gavega idaluku yana melala-nai Yelusalema wagaine, ada kadu anafaiweya Bana Yeisu Keliso giveiveimeya gavega inaluku Tauna yana ehaveimeya wagaine. Kai wana gina yavuna, keke tamo gaito anafata ginafali. Ada kai wana gina falina, aga keke tamo gaito anafata ginayavu.† Ee, yana vona taidei anafaiweya.

** 3:5 Taide ‘Yawai anaBuki’ wagaine ani badi yawai-vagata inuwagana adiyegana imiyamiya. (Ive 20:12,15, 21:27) † 3:5 Mad 10:32, Luk 12:8 † 3:7 Ais 22:22

⁸ Yami dewa ani matatabuna gaalamanena. Wana itana, wana yavuyavuna gasena wadebaimiya, wana-nai keke tamo gaito anafata ginafali. Yami toyogina kabisona nonogana yaku vewala wavemoimoinena ada keke wadavewa vaita wamulimuliyeku.

⁹ Kadu ganavona. Badiyavo Seitani anayeganeya ivagavagauta ani iawaawamogatala vaita badi taudiyavo ani meIsileli, aku velemona keke. Wada ivefwayafwaya. Aku wana itana, Iya badi ganagadi inaela ina iboula agemiya[†] ada ina inanami vaita imi kaliva-mina Iya ganuwakabubuyemi.

¹⁰ Tuwai-moena gavonemi vaita vitadina aimo ina yegeyegemona wagaimiya ani wada atuvefailedi, ada taide yaku vona-nai wavemoimoinena. Taidei faina aimo vita anatova-nai ginaelai babi matatabuna wagaine ke tomiyababi moyaidi gina galuvaluvadi, ani keke gina vaimi. Faina Iya gana yavami.[†]

¹¹ Tova kabisona ganaelai. Ada amivewala iwakana bade wavaina ke yami dewa yegayegadi ani wana abidoned, e ada tovetoyogina anakedukedu^{**} Yaubada givemi ani keke tamo gaito gina vaiyavule.

¹² Biyavo-dina Iya faikuya ina vetoyogina ani ganasedi ke ina veanafaiweya ogola seyana yaku

[†] **3:9** Ais 60:14 [†] **3:10** 2Pi 2:9 **** 3:11** Tovewainagona anakedukedu ani velesi anatovewainagona gina nuwagana, ada bana kuluwane inasena. E ada badi adivita inuwagadi Yeisu anayegana faina aku itoyogisegedi, ani Iyoni givonalufosau. Badi gavega gavavita bademowa inuwagadi aku itoyogisegedi, ani vaita ivewainagona ke adikedukedu inuwagadi. (Iyem 1:12)

Yaubada yana manuwa tabu giwaiwailemena. Ida gitoyoga ke gimiyamiya, ada keke anafata ina vaiyavule. Ada badi wagaidiya yegana toiye gana vetokilumidi, yaku Yaubada anayegana, ada yana melala anayegana, tainei Yelusalema evaguna[†] gina obuelai gabameya-deya yaku Yaubada wagaine. Ada kaduwe Tauku akuyegana evaguna[†] gana vetokilumina wagaidiya.

¹³ Imi gavega wa tagami ani wada nogala gavana Aluwaluwa Tabuna givonavona ekalesiya adiseveni wagaidiya.' "

Matawa melala Leodisiya tovetumagana adiyoo faidiya.

¹⁴ Kaduwe Keliso givoneku, givona, "Banae tonagona-nai Yaubada yana yoo Leodisiya wagaine giitaitaveyabidi ani bana wagaine una vetokiluma taide anafaiweya, unavona, 'Banae-nai anayegana Emeni ani tova moyaina wa yana idibumwaiga vona velemoena giawamogatalena, kadu ibuibubuna matatabuna Yaubada gibubudi ani Banae yadi ebavevuvu.[†] Ani yana vona taidei anafaiweya.

¹⁵ Yami dewa ani matatabuna gaalamana. Imiyavo ani keke vaita gufa tulutuluna anafaiweya ada kaduwe keke vaita gufa ginaginana anafaiweya. Nuwanuwaku imi

[†] 3:12 Ive 21:2 [†] 3:12 Ive 14:1 [†] 3:14 Kol 1:15

wada veanafaiweya gufa tulutuluna o kai gufa ginaginana.**

¹⁶ Aku imiyavo vaita gufa gilukalakalalava anafaiweya. E ada keke tulutuluna kadu keke ginaginana faina, gana kiwala yavulemi awakuya.

¹⁷ Faina imiyavo wavona, “Ime kaikaiwabumeyavo. Gaitoma moyaina wagaidiya amafaiweya.† Keke tamo gavana wagaine ada vemaufu.” Aku keke wada alamane imi velemono ana fanifanivegogoi, nuwakalikali miyavo, fanifan miyavo, matami koyo-moedi, ada konekonemiyavo.

¹⁸ Taidei faina galuwageyemi vaita wanaela wana kimone wagaikuya gola ikiveyegayeganena ai wagaine,† e ada amifaiweya wana vekaikaiwabu velemono. Kadu kaleko kwayakwayadi wana kimoned i wagaikuya ke wana osedi e ada kaliva yami gakonekone keke inaita ke wana vovomumu. Kadu mulamula wana kimone wagaikuya ke matami wagaidiya wana luababana e ada amifaiweya wanaita velemono.

¹⁹ Badi gavega ganuwakabubuyedi ani yadi dewa koyona gavevewaledi ke gakikivetunudi.† Taidei faina wana nuwawilami ada wana idibumwaiga ke wana dewadewa yegayegana.

²⁰ Wana itana, Iya gamidimididi wana lili-

** **3:15** Yeisu yana ifufu ani yana tonono yadi awaega Tauna wagaine faina. Nuwanuwana yana tonono moyaidi yadi awaega Bana wagaine ani taudiyavo ina awaega-moedi. (Lom 12:11)

† **3:17** Luk 12:21, Iyem 2:5 † **3:18** Ais 55:1, Mad 13:44, Vona 8:17-21 † **3:19** Ibel 12:6-13

vane galulutoli vaita gadaluku anafaiweya. Kai gaito seyana bonaku gina nogalina ada wana gina yavuna, Iya ganaluku banae tauna wagaine ada Iyayeku ke banae nodi anakani.[†]

²¹ Iya gaatuvefaila ke gavetoyogina, ada Kamaku yana veimeya anaebavetoga kaikaiwabuna wagaine Bana nodi avetoga. Ada kadu anafaiweya, biyavo-dina Iya faikuya ina atuvefaila ke ina vetoyogina ani gana awaegedi Iya nodi ana vetoga yaku veimeya anaebavetoga kaikaiwabuna wagaine.[†]

²² Imi gavega wa tagami ani wada nogala gavana Aluwaluwa Tabuna givonavona ekalesiya adiseveni wagaidiya.' ”

4

Tomiya gabama moyaidi Yaubada iawadavada.

¹ Vona-dina gavetokilumidi Yaubada yana yoo melala tulina tulina wagaidiya ani galuyabuna ada Iya Iyoni, gaitalaka gabameya ada gaitana wana yavuyavuna gimiyamiya. Ada bonabona nagona ganogalina vaita kaula iyuveyuvena anafaiweya, ani givona, “Una lakaelai idedeku ada gana vewaleni gavana aimo muline gina yegemona.”

² Ada maduga-mowa galutovonina Aluwaluwa Tabuna givemagaku, ada au gaitana veimeya anaebavetoga kaikaiwabuna gimiyamiya

[†] 3:20 Iyo 14:23 [†] 3:21 Mad 19:28

gabameya[†] ada seyana gaito givetovetoga wagaine.

³ Ada Banae ebavetoga-nai wagaine ani anaita anafaiweya kabala iluwei lunamanamalidi, ivewagadi yesipa ke kaneliyani.** Kadu yabavola gibalawalilivugina yana veimeya anaebavetoga, yana malina vaita kabala-nai matamatagina anayegana emeladi anafaiweya.[†]

⁴ Aku Banae givetogana veimeya anaebavetoga-nai nagona wagaine, ani kadu veimeya anaebavetoga kaikaiwabudi tuweniti-fowa ibalawalilivugina, ada ebavetoga-dina wagaidiya tomiya gabama aditonagona tuweniti-fowa ivetogadi. Adiveigavu kaleko kwayakwayana, ada kuluwadiya kedukedu kaikaiwabuna ibubuna gola wagaine vaita kini adiveigavu anafaiweya.

⁵ Ada veimeya anaebavetoga nagona wagaine-deya, atunama giatuatunama ada atala giluluatala ke butuna gilunununuga. Aku veimeya anaebavetoga wadebaine odama adiseveni iyabeyabela, tainei Yaubada Aluwaluwana adiseveni.**

⁶ Kaduwe veimeya anaebavetoga wadebaine seyana gaitoma vaita lavu niwaniwalovina aku ibubuna kelasi wagaine, anaita vaita kelasi mamali-moena anafaiweya.

[†] 4:2 Sam 11:4, 103:19, Ais 66:1, Mad 5:34, 23:22 ** 4:3 'Yesipa' ani seyana kabala matamatagina ada fatana lakaina. 'Kaneliyani' kaduwe kabala fatana lakaina ada yabeyabelina. † 4:3 Isik 1:26-28 ** 4:5 Una itana 1:4-5 anaailabama adiebakivemala, wadedeku naba-nai seveni ananuwanuwa giifuifufuyena.

Aku gabama anagaitoma wayawaidi adilaufuli[†] ani veimeya anaebavetoga-nai ibalawalilivugina. Seyana gimididi wadebaine, seyana wamuline, ada seyana gimididi fafali iluwei wagaidiya walilivane-deya. Aku gaitomadina seyana seyana ani matadi moyaidi vovodi ikiwafidi debaidiya ada mulidiya.[†]

⁷ Ada gabama anagaitoma wayawaina nagona ani anaita vaita laiyni anafaiweya, anavelu anaita vaita bulumakau anafaiweya, anaveto ani magigina anaita vaita kaliva anafaiweya, anavelaufuli anaita vaita manubutu giyaveyavega anafaiweya.

⁸ Ada badi gabama anagaitoma wayawaidi adilaufuli ani seyana seyana wa ofadi ani adiyoo sikisi,[†] ada matadi ani vovodi matatabuna wagaidiya kadu ofadi dibudiya. Ada yadayada ke bogi keke ida veyaveyawai aku au tova moyaina ivonavona,

“Kauveya Yaubada ani Totoyogi-vagaina.

Banae tabu tabu tabu. Yana nuwanuwa matatabuna ani yegayega-vagaidi.

Muliya-yo tova nagona givevuvu aku bademowa-deya Banae gimiyamiya, malinai gimiyamiya, ada kaduwe aimo gina miyamiya.”

⁹ Ada Banae-nai givetovetoga veimeya anaebavetoga kaikaiwabuna wagaine ada gimiyamiya-vagata,[†] ani badi gabama anagaitoma wayawaidi

[†] 4:6 Isik 1:5 [†] 4:6 Isik 10:12 [†] 4:8 Ais 6:2-3 [†] 4:9 Dan 4:34

adilaufuli ikaikaiyena, ivemoimoinena, kadu
ivesivesiuleyena. Ada gavatoveya taidei anafai-
weya idewa,

¹⁰ ayo badi tomiya gabama aditonagona
tuweniti-fowa ani iiboula-mowa ke ioduodu
Banae miyamiyani-vagaina wagaine.[†] Ada
adikedukedu kaikaiwabuna iseobuyedi veimeya
anaebavetoga wadebaine ada ivona,

¹¹ “O Kauveya yama Yaubada, Oyeni iwaka-
vagai
e ada alauboda kaliva moyaima
ana kaikaiyeni, ana vemoimoineni,
ada ayegana ana kikilakaina ya toyogina faina.
Faina O Tauni gaitoma matatabuna
ububudi.[†]
Ee, ya nuwanuwa faina iyegemona
imiyamiya.”

Taidei anafaiweya Yaubada idavana.

5

*Iyoni giitana Bana Lami buki uwalugena gi-
vaina.*

¹ Ada gamiyamiya aku Banae givetogana
veimeya anaebavetoga kaikaiwabuna wagaine,

[†] **4:10** Dan 6:26 [†] **4:11** Eba 1:1, Gug 14:15

ani buki uwalugena[†] nimana aiyatagina wagaine gaitana. Buki-nai uwalugena^{**} anafafali iluwei wagaidiya ivetokilumina ada anaebakivefota adiseveni isedi.

² Ada gaitana anelose totoyogina givona bonana lakaina wagaine, givona, “Gaito tovetoyogina e ada analauboda ebakivefota gina sigoloidi ada buki-nai uwalugena ginayavu?”

³ Aku keke tamo gaito gabama wagaine, kai babi wagaine o kai babi dibune gida miyami-yo anafata buki uwalugena gidayavu ke negenina gidaita.

⁴ Ada Iya gatagiya toyogina, faina keke tamo gaito ida nuwaga wa yana yegayegana ke analauboda buki uwalugena gidayavu negenina gidaita.

⁵ Ada gatagitagiya aku tomiya gabama aditonagona seyana givoneku, givona, “Keke una tagiya. Una itana, Banae-nai ivewagana ‘Iyuda anaunuma analaiyoni’ kadu ‘Deivida yana tubudelideli lakaina’ ani idauwe. Banae ani bademowa givetoyogina, e ada anafaiweya buki uwalugena anaebakivefota adiseveni gina sigoloidi ke buki-nai gina yavuna.”

⁶ Ada veimeya anaebavetoga kaikaiwabuna ada gabama anagaitoma-dina wayawaidi adilau-

[†] 5:1 Isik 2:9-10 ^{**} 5:1 Tova malinai buki kavegugaiyedi, aku tuwai-moena ani buki uwalugena kaliva ivegugaiyedi. Buki uwalugena ani fefe manamanawena ina uwana, ada anakivefosa faina gaitoma vaita yafa gideway a anafaiweya inasena afaine. E ada tova-nai gaito nuwanuwana gina veyawana, aga ebakivefosa gina sigoloina ada gina luyavuyavuna ke anavetokiluma gina veyawana.

fuli adimwatuguya, ani Lami seyana gimidimididi gaitana,[†] ada tomiya gabama aditonagonadina tuweniti-fowa imidifina. Lami-moena anaita anafaiweya vaita bademowa ida luvealika. Banae yana ebafwaiki adiseveni ada matana adiseveni, tainei ani Yaubada Aluwaluwana adiseveni giimilidi iyegemona babi matatabuna wagaine.

⁷ Ada Banae Lami-nai ginau Banae-nai givetogana veimeya anaebavetoga wagaine, ada buki uwalugena nimana aiyatagine-deya givaina.

⁸ Tova-nai buki-nai uwauwana givaina, gaitoma wayawaidi adilaufuli ada tomiya gabama aditonagona tuweniti-fowa iiboulamowa Bana Lami wadebaine. Badi seyana seyana api seyana giabina, kadu nauwa gola imaga inisenisi** magana iwaka-vagaina wagaine, taine ananuwanuwa ani Yaubada yana kaliva tabutabudiyavo yadi veoveola.[†]

⁹ Ada kweli evaguna ikweliyena[†] Lami wagaine, ivona,

“O Tovetoyogina e ada alauboda buki uwalugena unavai anaebakivefota una sigoloidi, faina Oyeni iluvealikani, ada O dayagi wagaine kaliva moyaidi

[†] **5:6** Ais 53:7, Iyo 1:29,36, 1Pi 1:19 ** **5:8** Taidei gaitomana-i ivewagana ‘inisenisi’ ani ai tulina tulina gidalidi magadi iwakadi nodi ina lomwanidi ke ina tutudi-yeku, ina vefaoda. (Iyeg 30:34-37) Ada ina kabuna wagaine, siyona magana iwaka-vagaina gina lakalaka Yaubada wagaine. Ada siyo-nai gilakalaka ani giveiyaiyaya vaita anafaiweya kaliva yadi veoveola gilakalaka Yaubada wagaine. [†] **5:8** Ive 8:3-4, 15:2, Sam 141:2 [†] **5:9** Sam 33:3, 98:1

uetoyavudi Yaubada faine.
 Badiyavo unuma seyana seyana,
 meya seyana seyana,
 yoo seyana seyana,
 kadu fafali seyana seyana wagaidiya-deya.
¹⁰ Ani Oyeni ukilakaidi ada usedi Yaubada
 yana yoo giitaitaveyabidi kadu veyavo
 anatovegugai adiivi[†] uveledi.**
 Ada ina veiveimeya babi matatabuna wa-
 gaine.”

Taidei anafaiweya yadi kweli.

¹¹ Ada kadu gaitanau ani gaitana ke ganogalina
 anelose moyai-vagaidi, adinaba anaetowawa
 ani tausani ke tausani, keke akufaiweya
 gana veyawadi. Ada anelose-dina ani veimeya
 anaebavetoga kaikaiwabuna ada gaitoma
 wayawaidi adilaufuli kadu gabama anatomya
 aditonagonayavo imidififidi.

¹² Ada bonadi lakai-moena wagaine ivonavona,

“Lami-nai iluvealikana ani Banae Tovetoyo-
 gina,
 e ada analauboda gina nuwagana toyogina,
 kaikaiwabu, ada nuwauya.

[†] **5:10** Ais 61:6, 1Pi 2:9, Ive 1:6, 20:6, 22:5 **5:10** **
 Tuwai-moena Yaubada yana veyavo anawai tuwaina anatoveya,
 badi veyavo anatovegugai ani adiveimeya kevakeva iveve-
 bolavoiyedi Yaubada wagaine. Aku aimo tova-nai Yeisu gielai
 ke Tauna vovona givebolavoiyena wagaine, kevakeva adive-
 bolavoi-nai vuvuna giavaina. E aku malinai ide yada vebolavoi
 anawai ani taudeyavo kana aseawaegeda Yaubada wagaine ada
 kana awadavadavana. (Lom 12:1, Ibel 13:15)

Ee, kana vemoimoinena, anayegana
kana kilakaina, ada kana davadavana!"

¹³ Ada gamiyamiya aku gaitoma seyana seyana wayawaidi Yaubada gibubudi gabameya ke babi getane ada babi dibune ke leyaga negenine, ani matatabudi nodi ivonavona,

"Banae givetogana veimeya anaebavetoga
kaikaiwabuna wagaine ada Banae Lami,
ani kana davadavadi ada kana vemoimoinedi.
Yadi iwakana mamalina ada yadi toyogina
imiyamiya-vagata, keke anaebalauiyabu!"

¹⁴ Ada gaitoma wayawaidiyavo adilaufuli ivona, "Ika anafaiweya!" Ada tomiya gabama aditon-agona tuweniti-fowa iiboula-mowa ada Banae givetoga veimeya anaebavetoga wagaine, kadu Lami-nai wagaidiya ioduodu.

6

Ebakivefota sikisi Bana Lami nagona gisigoloidi.

¹ Aku aimo gamiyamiya aku Bana Lami gaitana ginau ada buki uwalugena anaebakivefota seveni[†] wagaidiya-deya, seyana gisigoloina. Ada gabama anagaitoma wayawaidi adilaufuli wagaidiya-deya seyana bonana vaita atala anafaiweya ganogalina givona, "Unaelai!"

² Aku matakku ginau ani gaitana osi kwayak-wayana gimidimididi debaikuya. Anatoyage fewa gikiyabina, ada tovetoyogina adikedukedu

[†] 6:1 Ive 5:1,5-7

kaikaiwabuna ivelena. E ada banae giveve-toyogina gaviya moyaidi wagaidiya, ani gitauya ginau ke aimo kadu gina vevewainagona lugaviya moyaina wagaidiya.

³ Aku Bana Lami ebakivefota anavelu gisigoloina wagaine, ganogalina gaitoma wayawaina anavelu givona, "Unaelai!"

⁴ Ada kadu osi seyana giyegemona, banae yabeyabeli-moena. Anatoyage ani toyogina ivelena ke kukuya babi wagaine gina vaiyavulena ada kaliva ginagadi taudiyavo ina luluvealikadi. E ada benisi lakaina ivelena.

⁵ Aku Bana Lami ebakivefota anaveto gisigoloina wagaine, gaitoma wayawaina anaveto givona, "Unaelai!" Ada gaitanau ani osi bowabowana gaitana, ada anatoyage ani ebasikele giabina.

⁶ Ada bonabona ganogalina anafaiweya vaita kaliva gidavedo gaitoma wayawaidi adilaufuli adimwatuguya, givona, "Tova vitana gielaelai aa ananuwanuwa faine. Witi analita seyana ani fatana lakai-moena! Yadayada seyana anamatatabuna wagaine kaliva gina faisewa ke fatana-nai matatabuna wagaine gina kimonena. Ada bali analita toiye ani fatana anafaiweya.**
Aku ai olive ada gileifi bulavadi ani keke wana kivekoyodi e ada aimo bunama olive kadu waini ina miyamiya."

** 6:6 Witi ada bali ani yadi tabo laisi anafaiweya. Ada guwadi ina tututudi falawa anafaisewa faine. Witi falawana analauboda keiki ada beledi faidiya, aku bali ani beledi gaga faine ina kabukabudi. Bali ani meIsileli adiga velemono lakaina, e ada kai loka gina yegemona, bali fatana ani lakaina velemono.

⁷ Aku ebakivefota anavelaufuli gisigoloina wagaine, ganogalina gaitoma wayawaidi anavelaufuli givona, “Unaelai!”

⁸ Aku matakū ginau ani au gaitana osi anakala vaita toalika giyagona anafaiweya. Ada anatoyage ivewagana Alika, ada Toalika yadi Fafali givemulikofikofiyena Alika. Ada badi adiselu veimeya inuwagana ke babi tufona anakalivayavo ina luvealikadi. Vaita babi ida vutugena fafali laufuli wagaidiya, ada fafali seyana anakalivayavo ina luvealikadi aku fafali toiye adikalivayavo inamiya. Ee, ina munudi benisi wagaidiya, loka lakaina wagaidiya, veoga koyo-moedi wagaidiya, ada kevakeva walawala manimaninidi wagaidiya.

⁹ Aku Bana Lami ebakivefota anavefaifi gisigoloina wagaine, gaitadi toalika, ani aluwaluwadi ebavebolavoi dibune. Tuwai-moena kaliva-dina wayawaidiyavo anatoveya, badiyavo ani tova moyaina wa yadi idibumwaiga Yaubada yana vona iawaawamogatalena ke yadi vetumagana iifuifufuyena, e aku mali kaliva iluvealikadi.

¹⁰ Biyavo-dina bonadi lakaina ivedou ivona, “O amaToveimeya, Oye tabutabu-vagai ke ya nuwanuwa matatabuna ani yegayega-vagaidi kadu O vona velemono. Gavaiyei tova gina avaidi† ayo una vevonayavugidi babi anakaliva-dina iluvealikama, e ada dayagima gimadumadu unafata wagaidiya?” †

¹¹ Taidei anafaiweya iveola ada seyana seyana Yaubada giveledi nuya luveyalilina

† 6:10 Sam 94:3 † 6:10 Sam 119:84, Luk 18:7-8

aku kwayakwayana[†] ada givonediga, “Wana veyaveyawai kadu tova kabisona. Tuwaina imi wafaifaisewa Yeisu yana faisewa wagaine aku mali kaliva imunumi waalika. Ada malinai kadu tubuiyamiyavo ani imi anafaiweya ifaifaisewa Yeisu yana faisewa wagaine, ani kadu mali kaliva ina luvealikadi. E, ina luvealikadi ina naunauwena analaba moyaimi aminaba Iya gaveimeyena anafaiweya ina luyabuna.”

¹² Aku Lami ebakivefota anavesikisi gisigoloina wagaine, matakú ginau ani gaitana mabibi lakaina velemoena gimadu. Kauwana gisevedavedama gibowana[†] vaita baiki anakaleko bowabowa-vagaina anafaiweya,** ada vaikoi gisevedavedama matatabuna giyabelina vaita dayaga anafaiweya.

¹³ Ada kadu ailabama gabama wagaine ibeu babi wagaine vaita mala lakaina gidamadu ke ai guwaguwa guwadi gida tafimwanumwanudi anafaiweya.

¹⁴ Ada gabama giauwana vaita sita idauwa anafaiweya ke gina giavovolina, kadu oya ke imula seyana seyana iliudi ke yadi ebamiya-dina isegedi aku inau.[†]

¹⁵ Ada taide gaitoma-dina moyaidi ilakayegemona wagaine, babi anakiniyavo ke anatoveimeya, tolugaviya aditonagonayavo, badi kaikaiwabudiyavo ke badi wa adiyegana lakaina, badi togugai yogoyogodi ada badi keke

[†] **6:11** Ive 3:4-5, 7:9,13-14 [†] **6:12** Mak 13:24-25, Luk 21:25-28

**

6:12 MeIsileli yadi baiki anakaleko ani bowabowa-vagaina vaita wela-mowa anabowabowa anafaiweya. [†] **6:14** Iyel 4:24, Ive 16:20

togugai yogoyogodi ani matatabudi inau oya wagaidiya ivelusewavuyedi luwa wagaidiya ke kabala lakaidi adimwatuguya.[†]

¹⁶ Ivedovedou oya ada kabala wagaidiya, ivonavona, “Wanabeu wagaimeya! Wana sewavuyema e ada Banae-nai givetovetogana veimeya anaebavetoga wagaine keke gina itama, ada Lami yana nuwakoyo lakaina keke gina vaima.

¹⁷ Faina yadi nuwakoyo lakaina anatova bademowa giyegemona ke amamatavuloga ana nuwagana! Gaito anafata gina mididi?”

7

Yaubada yana aneloseyavo yana talakili isena meIsileli 144,000 wagaidiya.

¹ Taidei gaitoma-dina mulidiya matakku ginau, ani gaitana anelose adilaufuli babi imidi balawalilivugina mala matadi laufuli wagaidiya. Babi anamala laufuli-dina ikikiabidi e ada mala keke ginamadu babi wagaine, o leyaga wagaine, o kai gava ai seyana wagaine.

² Aku kadu anelose seyana gaitana gilakalaka kauwana ebalakavine, ada gaitoma seyana gikikiveyabina. Gaitoma-nai ani Yaubada miyamiyani-vagina yana talakili gimiyamiya wagaine, wada ivevegugaiyena e ani Yaubada yana talakili inasedi kaliva wagaidiya. Ada givedou bonana lakaina wagaine anelose-dina adilaufuli wagaidiya, badi Yaubada toyogina giveledi ada babi ke leyaga ina kivekoyodi.

[†] 6:15 Ais 2:19-21

³ Givedou wagaidiya, givona, “Keke babi o kai leyaga o ai wanamadu kivekoyodi. Wanaboda analaba Yaubada yana talakili anasena yana togugaiyavo debafoudiya.” †

⁴ Ada ganogalina gavaiyei kaliva aditalakili isedi. Taine kaliva wani analedi foti fowa tausani (144,000) ani Isileli natunavo adiunuma seyana seyana wagaidiya-deya, taidei anafaiweya.

⁵ Iyuda anayoo wagaidiya-deya, 12,000,
Lubeni anayoo wagaidiya-deya, 12,000,
Gada anayoo wagaidiya-deya, 12,000,

⁶ Asa anayoo wagaidiya-deya, 12,000,
Nafitalai anayoo wagaidiya-deya, 12,000,
Manasa anayoo wagaidiya-deya, 12,000,

⁷ Simiyoni anayoo wagaidiya-deya, 12,000,
Livai anayoo wagaidiya-deya, 12,000,
Isaka anayoo wagaidiya-deya, 12,000,

⁸ Sebuloni anayoo wagaidiya-deya, 12,000,
Iyosefa anayoo wagaidiya-deya, 12,000,
ada Beniyamina anayoo wagaidiya-deya,
12,000.

Taidei Isileli natunavo adiunuma-dina tuwelo anakaliva wagaidiya Yaubada yana talakili isena, adiyoo anamatatabuna ani 144,000.

Yaubada yana yoo lakai-vagaina iawadavada-vana gabameya.

⁹ Taidei gaitoma-dina muline mataku ginau kaduwe, gaitadi yoo lakaina, keke tamo gaito anafata gina veyawadi. Badiyavo ani unuma

† 7:3 Isik 9:4, Ive 9:4

seyana seyana wagaidiya, meya seyana seyana wagaidiya, ada ielai fafali seyana seyana babi matatabuna wagaine-deya, ada moyaidi imidimidi didi veimeya anaebavetoga debaine ada Banae Lami-nai debaine. Iveigavu nuya kwayakwayana wagaine ada bodaboda lukuna[†] nimadiya.

¹⁰ Ada ikovakova ivona,

“Yada Yaubada givetogana veimeya anaebavetoga kaikaiwabuna
wagaine ada kadu Banae Lami ani kakaikaiyedi,
faina wagaidiya-deya adakibababala givevuvu.”

¹¹ Ada tomiya gabama aditonagona kadu gaitoma-dina wayawaidi adilaufuli[†] veimeya anaebavetoga imidififina, ani badiyavo ke ebavetoga-nai ani anelose moyai-vagaidi imidififidi. Ada iiboula-mowa magigidi babiya veimeya anaebavetoga debaine ke Yaubada ioduoduna,

¹² ivona,

“Ika anafaiweya! Yada Yaubada kadavada-vana![†]
Tova moyaina kavesivesiule wagaine.
Kavemoimoinena ada kavewagana
Tonuwauya-mowa kadu Totoyogi-vagaina.
Anayegana kana kikilakaina-vagata ke vagata!
Ika anafaiweya.”

[†] 7:9 Vei 23:40, Iyo 12:13 [†] 7:11 Ive 4:6 [†] 7:12 1Awa 29:10-11

13 Ada tomiya gabama aditonagona wagaidiya seyana gielai ada gitolidadaneku givona, “Badi adinuya kwayakwayana ani ualamanedi? Ada gadedeku-deya iela?”

14 Galufata gavona, “Matalakaina, o ualamanena.”

Ada kaduwe givona, “Ida badiyavo ani mali kaliva uloulolo lakaina† ikiveyegemonina wagaidiya yadi vetumagana faina, aku au imididi toyogina. Adinuya ikoladi Lami dayagina wagaine ke gikwayadi ada yegayega-moedi.**

15 Taidei faina badiyavo ani Yaubada yana veimeya anaebavetoga debaine imiyamiya, ada yadayada ke bogi yana gugai igugugaiyedi Banae faine yana manawa tabu gabama wagaine.†

Ada Banae-nai givetovetoga yana veimeya anaebavetoga kaikaiwabuna wagaine, ani yana miyami wagaine gina lifitagodi† anafaiweya kamukamu natudiyavo kabikabisodi gilifilifitagodi ofadi wagaidiya.

16 Ada badi keke kadu mafa gina lavudi, keke kadu meyadi gina kwakwa, ada keke

† 7:14 Mad 24:21-22, Mak 13:19-20 ** 7:14 Vona-nai ‘adinuya ikoladi’ ananuwanuwa ani givonaluvefosau badi gavega ivetumagana Yeisu wagaine, ada Bana dayagina gimadu wagaine yadi koyona gikolayavuledi. E ada nuwainagedi yegayega-moedi, keke tamoyona koyona wagaine. (1Iyo 1:7) † 7:15 Ive 22:3 † 7:15 Ais 4:5-6

kauwana o kai gavana wa anaginaginana
lakaina gina kufuwafuwadi.†

17 Faina Banae Lami veimeya anae-
bavetoga kaikaiwabuna nefanine ani
gina itaitaveyabidi vaita toitaveyabina
yana sifi giitaitaveyabidi anafaiweya,† ada
gina nagoyedi inana
yawai anagufa anatovoga wagaidiya
ina yuyuga.

Ada Yaubada matailudi seyana seyana
gina luegege-yavulena matadi wagaine.”
†

8

*Bana Lami ebakivefota anaveseveni
gisigoloina.*

1 Aku Bana Lami ebakivefota anaveseveni†
gisigoloina wagaine, maduga-mowa gaitoma
matatabuna gabameya gikuludi tova kabisona
anafaiweya afenawa. Keke tamo geyo, keke tamo
bonabona.

2 Aku mataku ginau ani gaitadi anelose-dina
adiseveni tova moyaina imidimididi Yaubada
matane,** ada Banae kaula giveledi anelose
seyana seyana.

3 Kadu anelose seyana giyegemona gina gimi-
didi ebavebolavoi wadebaine, bana nimane
nauwa ibubuna gola wagaine inisenisi anaak-
abu faine. Ada inisenisi lakaina ivelena e

† 7:16 Sam 121:6, Ais 49:10 † 7:17 Sam 23:1-2, Mad 2:6,
Iyo 10:11 † 7:17 Ais 25:8, Ive 21:4 † 8:1 Ive 5:1, 6:1

** 8:2 Anelose-dina adiseveni faidiya una itana Ivemogatala 1:4
ke anaailabama adikivemala.

ada kaliva yadi veoveola nodi gina vebolavoiyedi, kaliva-dina Yaubada yana yoo tabutabudiyavo moyaidi. E ada veimeya anaebavetoga kaikai-wabuna debaine inisenisi-nai gikabuna ebavebolavoi ibubuna gola wagaine.

⁴ Ada inisenisi-nai siyona magana iwakana, ani Yaubada yana yoo tabutabudiyavo yadi veoveola nodi ilaka Yaubada wadebaine[†] anelose nimanede-
deya.

⁵ Au bana anelose-nai inisenisi ananauwa givaina ada givemagana ebavebolavoi anaaiyabeyabela wagaine,[†] ada gisegeobuyena babi wagaine. Ada tova-nai gisegeobuyena, atunama inamanama, atala iluwatatala, ada mabibi gimadu.

Anelose adilaufuli yadi kaula iyuvedi.

⁶ Muliya anelose adiseveni badi kaula iveledi ani ikidewadewa ina yuvedi.

⁷ Bana anelose nagona yana kaula giyuvena wagaine, wei matadi iveaisi kadu aiyabeyabela ilomwanina dayaga nodi[†] ani isegeobuyedi babi wagaine. Ee, vaita babi ida vutugena fafali toiye wagaidiya, ada anafafali seyana ana ai nodi gialai-yabudi, aku babi anafafali iluwei ani iwakadi. Aku laimwagu ani matatabuna gialai-yabuna.

⁸ Aku bana anelose anavelu yana kaula giyuvena wagaine, au gaitoma vaita oya lakaina gialaalata ani isegeobuyena leyaga wagaine. Ada vaita leyaga ida vutugena anafafali toiye wagaidiya ada anafafali seyana gisevadavedama

[†] 8:4 Ive 5:8 [†] 8:5 Vei 16:12 [†] 8:7 Iyol 2:30

givedayaga, aku leyaga anafafali iluwei ani iwakadi.

⁹ Ada fafali-nai givedayaga wagaine ani gavana wayawaina matatabuna ialika, kadu waka imiyamiya fafali-nai wagaine ani matatabudi ikivekoyo-yabudi.

¹⁰ Aku bana anelose anaveto yana kaula giyuvena wagaine, au ailabama lakaina giyabela vaita odama anafaiweya ani wagabameya-deya giobu gibeu gufa ada gufa tovoga wagaidiya. Vaita babi matatabuna ida vutugena anafafali toiye wagaidiya, ada fafali seyana anagufa ke anagufa tovoga ani ailabama gialaalata gibeu wagaidiya. Aku babi anafafali iluwei ani iwakadi.

¹¹ Ailabama-nai anayegana 'Golagola'. Ada babi anafafali-nai seyana anagufa matatabuna giivegolagolana ada kaliva moyaidi bana ialikena. Aku babi anafafali iluwei adigufa matatabuna ani iwakadi, keke idakoyo.

¹² Aku bana anelose anavelaufuli yana kaula giyuvena wagaine, au kauwana, vaikoi, ada ailabama yadi malina ikoyo. Vaita kauwana ida vutugena yana fafali toiye wagaidiya, ada fafali seya-moena imununa ke anamalina-nai giyuyuvana aku yana fafali iluwei ani iwakadi. Kadu anafaiweya vaikoi ke ailabama, yadi fafali seya-moena imununa ke giyuyuvana aku yadi fafali iluwei iwakadi. Ada babi wagaine, vaita yadayada anatova ida vutugena anabai toiye wagaidiya aku seyana wagaine anamalina keke gida tuimali. Ada kadu anafaiweya bogi wagaine, anabai seyana keke wa anamalina.

13 Matakū gilaka ada manubutu gaitana giyavega balawaliwalilivuga mwatuguya ani bonana lakaina wagaine givonavona, "Oiyoi! Nuwakalikalidiyavo! Badiyavo imiyamiya babiya ani nuwakalikalidiyavo! Kaula toiye aimo imiyamiya† ani tova kabisona anelose-dina aditoto ina yuvedi!"

9

Anelose anavefaifi yana kaula giyuvena.

¹ Aku bana anelose anavefaifi yana kaula giyuvena wagaine, gaitana ailabama seyana nagona gabameya gimiyamiya aku giobu gibeu babiya. Ada olu keke wa anaebalauyabu ani anaki ivelena ailabama-nai.

² Aku olu keke wa anaebalauyabu awana giyavuna wagaine, siyo lakai-moena giyegemona awane, siyo-nai vaita laimwagu idatui siyona. Ada kauwana yana malina ada mwatugu ani luwa-nai siyona giyuyuvanibodena.

³ Ada siyo-nai negenine-deya bilolo† iyegemona babi wagaine, ada toyogina inuwagana vaita alagavigavi imiyamiya babiya anafaiweya.

⁴ Ada bilolo-dina adiveimeya ani keke laimwagu, ai, o kai gavagudana itabotabo babi wagaine ina kivekoyodi. Au kaliva gagana ina kivekoyodi. Keke kaliva matatabuna aku badi gavega Yaubada yana talakili debafoudiya keke gida miyami gagana.

⁵ Bilolo-dina wa adiawaega ke ulolo lakaina ina kiveyegemonina kaliva-dina wagaidiya

† 8:13 Ive 9:12, 11:14 † 9:3 Iyeg 10:4,12

vaikoi faifi wagaidiya, aku keke awaega idavai ke ina luvealikadi. Ee, uloulolo-nai kaliva ina lutovonina ani vaita alagavigavi yana iyovaga anafaiweya.

⁶ Tayuwe tova-nai wagaine, kaliva alika anawai ina lлена wagaine ina alika, aku keke ina nuwaga. Moyaidi inavona, ina vonaga, "Oiyoi! Nuwanuwaku gana alika!" aku keke alika ina nuwaga.

⁷ Aku taine bilolo-dina adiita ani vaita osi ikidewadewa ina lugaviya anafaiweya. Kuluwadi wagaidiya seyana gaitoma anaita vaita kedukedu kaikaiwabuna ibubuna gola wagaine anafaiweya, aku magigidi anaita vaita kaliva magigidi anafaiweya.

⁸ Kuluwadi anaita vaita vevine kuluwadi man-amanawena anafaiweya, aku nigodi vaita laiyni nigodi anafaiweya.

⁹ Manawadi anasebabala ibubudi ayani wagaine, aku ofadi butuna vaita osi salioti moyaidi itaitaidi imadumadu gaviyeya anafaiweya.

¹⁰ Ada badi gigudi vaita alagavigavi gigudi wa yadi ebaiyonaga anafaiweya. Ada toyogina-nai inuwagana ke kaliva ina kiveuloulolonidi vaikoi faifi wagaidiya ani gigudi adi ebaiyonaga wagaidiya.

¹¹ Ada badi yadi kini yana veimeya dibune imiyamiya, ani bana anelose-nai olu keke wa anaebalauyabu anatoitaveyabina. Anayegana vona Ibeliu** wagaine ani 'Abadoni', aku vona

** 9:11 Vona Ibeliu ani melsileli yadi vona.

Giliki wagaine ani 'Apolioni'.**

¹² Ee, ebakiveuloulolo vita-moena nagona bilolo ikiveyegemonina, ani bade giavaina. Aku wana itana, kadu ebakiveuloulolo vita-moena iluwei ani aimo ina yegemona.†

Anelose anavesikisi yana kaula giyuvena.

¹³ Aku bana anelose anavesikisi yana kaula giyuvena wagaine, au bonabona ganogalina, giyegemona ehavebolavoi gola anaebafwaiki adilaufuli wagaidiya-deya. Taine ehavebolavoi-nai gimidimididi Yaubada wadebaine.**

¹⁴ Ada bonabona-nai ganogalina ani givona anelose anavesikisi wagaine, bana kaula ni-mane, givona, "Tayuwe anelose-dina adilaufuli iyogodi ada isedi gufa madumadu Yufeleitisi ani, wana etoyavudi inanau."

¹⁵ E ada ginau anelose adilaufuli gietoyavudi. Au badi anelose-dina ani tova tuwai-moena ikidewedewedi ke ibodaboda malamala-nai faine, vaikoi-nai faine, yadayada-nai faine, kadu kauwana anabai-nai faine ani adietoyavuga ina nuwagana ke inana kaliva ina luvealikadi.** Vaita babi anatomiyayavo ida vutugedi adiyoo toiye wagaidiya, ada adiyoo seyana ina luvealikadi, aku adiyoo iluwei ani iwakadiyavo.

** **9:11** Taide yegana-nai 'Abadoni' anakivila ani 'Luyavula', ada 'Apolioni' anakivila ani 'Toluyavula'. † **9:12** Ive 8:13 ** **9:13** Ehavebolavoi taidei ani anainana bademowa daba 8:3 wagaine.

** **9:15** Taidei kaliva-dina ina luvealikadi ani badi Yaubada ada Natuna Yeisu ivedomobubusedi. Keke maita nuwanuwadi Yaubada yana veyavo anawai ina itaveyabi o kai yana veimeya ina mulimuliyedi.

¹⁶ Aku tolugaviya wa yadi osi iyegemona ani adiyoo anamatatabuna ganogalina anafaiweya tausani ke tausani, anafaiweya tu analedi milioni (200,000,000), moyai-vagaidi.

¹⁷ Ada akuvewala-nai wagaine osiyavo ada aditoyage-dina gaitadi ani adiita taidei anafaiweya. Toyage manawadi anasebabala adikala ani yabeyabeli-moena vaita aiyabeyabela anafaiweya, matamatagidi vaita leyaga anafaiweya, kadu yagoyago-moena vaita salufa anafaiweya.** Osi kuluwadi vaita kevakeva laiyni kuluwadi anafaiweya, ada aiyabeyabela, siyo, ada salufa iyegeyegemona awadiya-deya.

¹⁸ Taide vita koyo-moedi toiye iyegemona osi awadiya-deya ani babi anatomiya tufona moy-aidi iluvealikadi. Vaita babi anatomiyayavo ida vutugedi adiyoo toiye wagaidiya, ani adiyoo iluwei auwe iwakadi aku adiyoo seyana ani matatabudi iluvealikadi.

¹⁹ Taidei osi-dina ani yadi toyogina lakaina awadi wagaine aku kadu gigudi wagaine. Faina gigudi vaita mota wa kuluwadi anafaiweya, ada wagaidiya kaliva ikikivekoyodi.

²⁰ Ee, ada tayuwe vita koyo-moedi kaliva tufodi imunudi ada ialika. Aku kaliva-dina keke ida alika uloulolo-dina wagaidiya ani aimo keke ida nuwaviladi yadi gugai koyodi-dina wagaidiya, aku au ikwagekwageyena. Keke Yaubada wagaine ida miyaviladi aku au aimo ioduodu

** **9:17** Toyage-dina manawadi anasebabala adikala ani vaita ai gialaalata, siyo, ada salufa anafaiweya. Ada taide kala-dina iveebaita Yaubada yana vonayavuga ke yana matavuloga. (Eba 19:24, 19:28, Sam 11:6, Isik 38:22, Luk 17:29)

aluwaluwa koyodi ke yaubada fwayafwaya adik-ilumina wagaidiya. Taine kilumina-dina ibubudi gola, siliva, ayani, kabala, ada ai wagaidiya ibubudi, ada keke adifaiweya inaita, ina nogala, o ina nunudadana.[†]

²¹ Au biyavo-dina aimo kaliva iluluvealikadi, ibogabogavu,^{**} vovodi iawaawaegge-kavokavovodi, ada ikiyakiyafu. Keke-mowa nuwanuwadi ina nuwavila ke yadi dewa koyodi-dina ina vedomobubusedi.

10

Anelose ada buki uwalugena kabisona nimana wagaine.

¹ Aku kadu anelose totoyogina seyana gaitana giobuobuelai wagabameya-deya, aku buibui seyana gikiwafina ada yabavola kuluwana getane. Magigina gimalina vaita kauwana malina anafaiweya, ada akena adiita vaita ogola iluwei iyabeyabela anafaiweya.

² Nimana wagaine buki uwalugena kabisona iyavuna gimiya. Ada akena aiyatagine givaga leyaga wagaine aku akena aimauline givaga babi wagaine,

³ ada gikova moiya-vagina vaita laiya bōnana anafaiweya. Ada yana kova giavaina, atala adiseveni taudiyo bonadiya iifuifu.

[†] 9:20 Sam 135:15-18

^{**}

9:21 Taide dewa-dina anafaiweya bogavu, welavi, kiyogoyogo, ani keke ida miya Yaubada yana ebaveimeya wagaine, ada badiyo taide dewa-dina idewadewedi ani faidiya Iyoni givetokiluma taide maita-nai wagaine.

⁴ Ada atala adiseveni ilovau wagaine, gada vebutu yadi ifufu gada vetokiluma ani bonabona wagabameya-deya ganogalina givoneku, givona, “Gavana atala-dina adiseveni ivonayena ani au sewasewavuyena gina miyamiya. Keke una vetokilumidi.”

⁵ Aku bana anelose-nai bade gaitana gimidimidi leyageya ke babi wagaine, ani nimana aiyatagina gitunelakaina gabama wagaine,

⁶ ada givonadabadaba toyogina Banae gimiyamiya-vagata anayeganeya. Banae-nai ani gabama gibubuna ke gaitoma-dina imiyamiya wagaine, ada babi gibubuna ke gaitoma-dina imiyamiya wagaine, ada leyaga gibubuna ke gaitoma-dina imiyamiya wagaine. Taidei anafaiweya anelose givona, “Tova boda anatova giavaina.

⁷ Aku tova-nai anelose anaveseveni yana kaula gina yuvena, ayo Yaubada yana nuwanuwa sewasewavuyena gina seyegemonena ke gina yegemona velemono. Tuwai-moena yana nuwanuwa-nai giawamogatalena yana togugaiyavo badi falofita wagaidiya anafaiweya, gina kiveyegemonina mamauwe.” Taidei anafaiweya anelose-nai yana vona.

⁸ Givona giavaina, ayo bonabona-nai wagabameya-deya bade ganogalina ani kadu givona-vagileku, givona, “Unana buki uwalugena iyavuna una vaina anelose nimane, bana agenaseyana leyageya ke kadu seyana babiya.”

⁹ E ada ganau anelose wagaine ke gaveolena buki uwalugena kabisona gida veleku. Ani givoneku, givona, “Unavai una kanina. Kamo

wagaine gina vegolagola, aku awa wagaine analutovona ani digadigagina vaita mawa anafaiweya.” **

¹⁰ E au buki uwalugena-nai gavaina anelose nimane-deya ke gakanina. Ada awaku wagaine analutovona gidigaga vaita mawa anafaiweya, aku gatono giobu ani givegolagola e ada kamoku analutovona keke iwakana.

¹¹ Ada anelose-nai givoneku, givona, “Oye gilubodani kaduwe una falofisai-vagila kaliva moyaidi yadi kini nodi faidiya. Gavana Yaubada yana nuwanuwa gina alaveleveleni badi faidiya ani una awamogatalena. Gavayoo, gavameya, ada gavafafali wagaidiya imiyamiya.”

11

Yaubada yana falofita adiselu.

¹ Ada giveleku ebaetowava vaita aiwala anafaiweya ada givoneku, givona, “Una mididi unana Yaubada yana manuwatabu kadu ebavebolavoi una etowavadi, ada kadu una veyawadi gavega wadedeku ioduodu.

² Aku fafali-nai manuwatabu anamanuwamoena wamelaleya ani keke una etowava. Unasege ginamiya, faina Yaubada fafali-nai giatuegena badi keke meIsileli wagaidiya. Ada melala-nai tabutabuna Yelusalema

** **10:9** Vona-dina ‘awa wagaine analutovona ani digadigagina vaita mawa anafaiweya’ ani faidiya una itana Isikeli 2:8 - 3:3, Same 119:103, ada Iyelemaiya 15:16.

ina veiveimeyena vaikoi foti tu (42) aditova wagaidiya** ke gaitoma moyaina ina kivekoyodi.†

³ Aku tayuwe tova-nai wagaine, yaku toawatalatalaina adiselu veimeya gana veledi, ke Yaubada yana vona ina falofisaiyena yadayada wani tausani tu analedi ada sikisiti (1,260) wagaidiya. Adinuya ani kabolo adibaiki, adiita keke iwakadi.” ** Taide anafaiweya anelose givona.

⁴ Aku badi kaliva-dina adiselu ani anafaiweya ai-dina olive iluwei, kadu mayale adiebaibo-dina iluwei** imidimididi Yaubada wadebaine, Banae babi matatabuna anaToveimeya.

⁵ Ada kai tamo gaito gina galuvaluva gina kivekoyodi, aga awadi wagaine aiyabeyabela gina yegemona ada nibaidiyavo gina alaidi ina alika. Kai tamo gaito nuwanuwana

** **11:2** Vaikoi foti tu (42) ani vaita yadayada wani tausani tu analedi sikisiti (1,260) anafaiweya. † **11:2** Luk 21:24, Ive 13:5

** **11:3** Tayuwe adinuya-dina ani badi meIsileli yadi iyaiyaya nuwavita faina. Givewala vaita toawatalatalaina-dina adiselu yadi valeya ani ebamatauta kivekoyo lakai-moena, e ada kaliva ina alamanena vaita idamadu nuwavilana. **

11:4 Ai-nai olive taide maita-nai wagaine ani giveiyaiyaya banae kaliva-nai KAUYEYA gikivemwamwalina. Ebaita ani Kini Deivida Same 52:8 wagaine, tauna giawaluvaluvayena vaita 'ai olive matamatagina Yaubada yana manuwa wagaine'. Maita taide wagaine, Iyoni anavewala ani KAUYEYA anatoitavedama adiselu iawaluvalu-vayedi vaita badi ai olive ada kadu mayale anaebaibo. Ai olive wagaidiya fiuli ivaivaina ke mayale ivevemagadi yadi malina faine, ada kadu anafaiweya toitavedama adiselu-dina ani Aluwaluwa Tabuna givevemagadi. E ada mayale yuyuvana ituituimalina anafaiweya, adiselu babi taide anayuyuvana ituituimalina. (Sam 52:8, Sek 4:3,11,14)

gina kivekoyodi, aga gilubodana taide anafaiweya ina luvealikana.

⁶ Kaduwe badi kaliva-dina adiselu, ani wa yadi veimeya toyogina ke adifaiweya inavona ada mwatugu gina abodana, e ada wei keke ginaobu yadayada-dina anamatatabuna wagaidiya ifalofalofisai. Kadu tova bademowa gavaiyei nuwanuwadi anafaiweya, badi wa yadi veimeya ke gufa gavafafali wagaine ina sevadavedamana ke gina vedayaga, ada adifata babi ina mununa vita koyo-moena tulina tulina wagaidiya.**

⁷ Ada yadi awatalatalaina gina avaina, kevakeva-nai koyo-moena manimaninina[†] ginalaka olu-nai keke wa anaebalauyabu wagaine-deya, ani gina lugaviyadi ke gina toyogisegedi, ada gina luvealikadi.

⁸ Vovodi inase-kavovodi melala-nai lakaina wa anayegana anawai lakaina wagaine ina miyamiya. Melala-nai ivonaluvefosau wagaine ivewagana Sodoma kadu Itipita. Melala-nai wagaine tuwaina yadi Kauveya ikivebolagalagana.

⁹ Yadayada toiye ke afuna wagaidiya, kaliva moyaidi nuwadi givaina ani inaela toawatalatalaina-dina adiselu vovodi ina itavutuvutudi, ada keke ina awaenge gaito seyana vovodi ginasedi didikula luwa negenine. Badi kaliva-dina ielaelai ani meya tulina tulina,

** **11:6** Taidei 'vita koyo-moena tulina tulina', ani anafaiweya tova-nai Mosese Itipita wagaine ginau Felo wagaine giveola meIsileli gida awaegedi Itipita idasege idanau. Aku Felo ani keke gida awaenge, e ada Yaubada vita koyo-moedi giimilidi meItipita wagaidiya. (Iyeg 7:14 - 12:30) [†] **11:7** Ive 13:5-7

unumidi tulina tulina, yadi fafali tulina tulina, ee wagaidiya-deya ina tauya inaelai vovodi ina itaitadi.

¹⁰ Ee, babi anatomiyayavo moyaidi ina gakaikai ada ina vemwamwala lakaina, ada yadi nuwakabubu ina kidewedewedi ke ina avetavetaledi tubuiyadiyavo wagaidiya. Faina taide falofita-dina adiselu yadi tova wayawaidi wagaine, tova moyaina uloulolo ke vita lakaidi iveleveledi babi anatomiyayavo.

¹¹ Aku yadayada-dina toiye ke afuna giavaidi, Yaubada ani yawaina giveyawaivedamana badi adiselu wagaidiya, ada imididi wayawaidi. E ada badi gavega iitadi ani imatauta lakaina.

¹² Aku bonabona lakaina wagabameya-deya giobuelai, ani falofita-dina adiselu inogalina givonedi, givonaga, "Wana lakaelai idedeku!" Ada nibaidiyavo iitaitadi aku buibui wagaine ilaka gabameya.

¹³ Ada kauwana anabai-nadi wagaine mabibi lakaina babi giiliuna toyogi-moena, ada manawa tufona moyaidi melala-nai wagaine ibeu kadu kaliva tufona moyaidi ialika. Adinaba ani vaita melala ida vutugena anafafali teni wagaidiya, ada fafali seyana anamanuwa matatabudi ibeu ke anatomiyayavo matatabudi ialika, adiyoo seveni tausani (7,000). Aku fafali adinaeni adimanuwa ke anatomiyayavo ani iwakadi. Aku badi aimo wayawaidiyavo imiyamiya, ani imatauta vele-moena aku Yaubada gabameya yana toyogina iinanana ke anayegana ikikilakaina.

¹⁴ Ee, ebakiveuloulolo vita-moena anavelu ani bademowa, aku ebakiveuloulolo vita-moena

anaveto tova kabisona gina lakayegemona.

Anelose anaveseveni yana kaula giyuvena.

¹⁵ Aku anelose anaveseveni ginau yana kaula giyuvena, ani ganogalina bonabona moiyaalidi gabameya ivonavona, “Malinai ebaveimeya-nai babi taide wagaine ani Yaubada anatoinavuvuna, Yaubada ke yana Keliso nodi, ada gina veiveimeya-vagata ke vagata.”

¹⁶ Ada tomiya gabama aditonagona tuwenitifowa ivetovetoga Yaubada debaine yadi veimeya anaebavetoga kaikaiwabudi wagaidiya, ani isegedi aku iiboula-mowa magigidi babiya ke ioduodu Yaubada wagaine.

¹⁷ Ivona,

“Oye Yaubada Totoyogi-vagai,
muliya-yo tova nagona givevuvu aku
bademowa-deya umiyamiya,
ada kaduwe malinai umiyamiya.
Avesiule O wagainiya faina O ya toyogina
lakaina uvaina ke uvebutu uveiveimeya.

¹⁸ Yoo moyaidi babi anafafali tulina tulina
wagaidiya inuwakoyo wagainiya,
aku ya nuwakoyo lakaina anatova ani bade
giyegemona.

Tova taidei toalika una vevonayavugidi, kadu
malinai ya togugaiyavo moyaidi adilaufata
iwakana una veledi.

Ee, badi falofitayavo kadu ya kaliva
tabutabudiyavo,
ada badi wa yadi matauta ivemoimoineni,
kai adiyegana lakaina o kai kabisona, ani

moyaidi adilaufata iwakana anatova bade
giyegemona.

Aku kaduwe tova taidei badi babi ikivekoy-
ona ani una luyavuledi.”

¹⁹ Ada tomiya gabama aditonagona yadi vei-
fuiufu giavaina, Yaubada yana manawa tabu
gabama wagaine giayavuna, ada yana veyavo
anawai anabokesi gaitana manawa tabu-nai ne-
genine. Ada matakuya atunama iatunama, atala
giluwatala ke butuna gilunununuga, mabibi babi
giliuna, ada wei matadi lakaidi iveaisi ani moyai-
moedi kadu vitadi iobu.

12

Vavine ada umala lakai-moena wa ofana.

¹ Gaitoma-dina mulidiya kaduwe taide
akuvewala-nai gaitana ani iyaiyaya lakaina
ke ebanuwanuwa giyegemona gabameya. Taine
vavine kauwana anamalina giveiveigavuna
ada gimidimididi vaikoi tabone. Ada kedukedu
kaikaiwabuna kuluwane ani ibubuna ailabama
adituwelo wagaidiya.

² Ada vavine-nai waifugana ke tova kabisona
gina venatuna, e ada wa yana uloulolo lakaina
gitagitagiya toyogina.

³ Au kadu gaitoma ebameyasidobodobo
wa ananuwanuwa lakaina giyegemona gabama
wagaine, ani umala yabeyabelina lakai-moena
wa ofana aku koyo-vagaina.** Bana kuluwana
adiseveni ada ebafwaiki teni, ada kuluwa

** **12:3** Taidei umala-nai koyo-vagaina ani ivonaluvefosau Sei-
tani faine.

seyana seyana wagaine kini anakedukedu
kaikaiwabuna gimiyamiya.

⁴ Ada giguna wagaine ailabama gabameya tu-
fona moyaidi gilukakidi ada gisegeobuyedi babi
wagaine. Vaita ailabama ida vutugedi adiyoo
toiye wagaidiya ani adiyoo iluwei auwe iwakadi
aku adiyoo seyana ani matatabudi gibatugedi
iobu babiya. Bana umala-nai tunutunugina
ginau vavine-dina kabiso-moena ina venatuna
ke gimididi wadebaine, e ada tova-nai be-
beta gina tubuga ani au maduga-mowa ginakani-
yabuna.

⁵ Au vavine kwamana kaliya ivenatunena.
Banae aimo yoo tulina tulina imiyamiya babi
anafafali moyaidi wagaidiya gina veiveimeya
wa yana toyogina vaita gida kiabina kini yana
aiwala ibubuna ayani wagaine. Aku umala-nai
ani kabiso-moena vavine-dina natudi gida kanina
ani au anelose isilemana ada gilakavena
gabameya Yaubada wagaine, kadu yana veimeya
anaebavetoga kaikaiwabuna wagaine.

⁶ Aku badi vavine ani iota inau fafali-nai tuwai-
moena Yaubada givenuwadadanena wagaine,
tainei fafali kavovona wagaine. Wadedeku-deya
tova manamanawena ina itaitaveyabidi anafai-
weya yadayada wani tausani tu analedi ada
sikisiti (1,260).

⁷ Vavine iota inau, e au gaviya givebutu
gabameya-deya. Anelose lakaina Maikolo**
wa yana aneloseyavo nodi ilulugaviyadi umala,

** 12:7 'Maikolo' ani Yaubada yana anelose lakaina seyana
meIsileli giitaitaveyabidi. (Dan 10:13-21, Iyud 9)

kadu umala-nai yana aneloseyavo nodi ilugaviyadi Maikolo yana yoo nodi.

⁸ Aku umala lakai-moena yana toyogina keke anafata, e ada Maikolo wa yana aneloseyavo nodi itoyogisegena. Tainei faina umala lakai-moena wa yana aneloseyavo koyodiyavo nodi ani keke tamo yadi ebamiya gabameya ke aimo adifata ina miyamiya gabama wagaine. E ani au, isegevagaina.

⁹ Ada umala-nai lakai-moena[†] ani Maikolo yana aneloseyavo nodi isegeobuyedi babi wagaine. Bana umala-nai kaduwe ani mota-nai tova anaebavevuvu wagaine-deya gimiyamiya, banae ivewagana ‘toveloi-kavokavovo’, bana Seitani. Banae-nai yana vefwayafwaya wagaine babi anakalivayavo moyaidi gifwayanegenegedi. Ee, umala wa yana aneloseyavo nodi isegeobuyedi babi wagaine imiyamiya.

¹⁰ Ada bonabona moiyalina gabama wagaine ganogalina, givona,

“Malinai Yaubada yana kibababala ke yana toyogina bademowa ilakayegemona!

Yana ebaveimeya giseyegemonena, ada yana Keliso ani yana veimeya giivemogatalina.

Faina banae tubuiyadeyavo aditoveloi ani Yaubada yana aneloseyavo bademowa ibatuge giobu, banae-nai yadayada ke bogi tubuiyadeyavo giawavekoyoyedi Yaubada matane.[†]

¹¹ Ada tubuiyadeyavo itoyogisegena. Faina Bana Lami dayagina ivetumaganena,

[†] 12:9 Ive 20:2-3, Luk 10:18 [†] 12:10 Iyob 1:9-11, Sek 3:1

ada Keliso yana kibababala faina iawatalata-laiyena kaliva wagaidiya.

Kadu taudiyavo yawaidi keke
ida nuwakabubuye-moedi ke
ida nuwalolonedu aku au isefaga ina alika.†

Gaitoma-dina faidiya badi aditoveloi bana
Seitani itoyogisegena.

¹² Tainei faina imi gabama anatomiyayavo
ani wana vemwamwala lakaina!

Aku imi babi anatomiyayavo ke leyaga
anatomiyayavo ani tova vita-moena
wana nuwagana!

Faina banae toveloi-kavokavovo ani wa yana
nuwakoyo giobuelai wagaimiya.

Ginuwakoyo lakai-moena faina gialamanena
yana tova givemaufu.” **

Taide anafaiweya bonabona gabameya givona.

¹³ Ee, aku bana umala-nai isegeobuyena babi
wagaine ani tauna giitanuwagana wagaine, gina
gimadufenegadi vavine-dina badi kwamana
kaliya ivenatunena.

¹⁴ Aku vavine-dina ani Yaubada giveledi ofadi
iluwei vaita manubutu lakaina ofana anafai-
weya, e ada adifaiweya ina yavega ina maduota
inanau fafali kavovona wagaine. Wadedeku-
deya Yaubada yana anelose ina itaitaveyabidi tova
manamanawena, anafaiweya malamala toiye ke

† 12:11 Luk 14:26, Ive 2:10

**

12:12 Bana nibaida ivewa-
gana 'toveloi-kavokavovo' ani Seitani, ada yana tova givemaufu
ananuwanuwa ani gialamanena yana tova bademowa givelili-
vana ke Yaubada gina luyavulena.

vaikoi sikisi, e ada bana umala-nai keke anafaiweya gina munudi.

¹⁵ Ada umala gimididi ke awana gilana aku gufa madumadu-mowa giyegemona ani gimadu ginau vavine wagaidiya ke wayagata-nai gina alugedi ina nu-vagata.

¹⁶ Aku babi vavine gilemedi ani giayavalina ada gufa matatabuna umala awane-deya gimadumadu ani babi giyuna.

¹⁷ Taidei faina umala-nai matana gifata vavine-dina wagaidiya, e ada gitauya ginau natudiyavo velugadiyavo wagaidiya kadu yadi tubudelideliyavo moyaidi wagaidiya ke gina lugaviyadi.[†] Biyavo-dina ani Yaubada yana veimeya imulimuliyedi, kadu iabidonau Yeisu yana vona velemoena wagaine.**

¹⁸ Ada umala gina gimidimididi avala anamakama wagaine.

13

Kevakeva lakaina manimanini-moena gilaka leyaga wagaine-deya.

¹ Ada bana umala-nai gimidimididi avaleya aku kevakeva lakaina manimanani-moena seyana gaitana gilakalaka leyaga wagaine-deya. Kevakeva-nai kuluwana adiseveni kadu yana

[†] 12:17 Eba 3:15, 1Pi 5:8

**** 12:17** Iyoni yana vona-nai “iabidonau Yeisu yana vona velemoena” ani Buki Tabu tufodi ikiviladi yada vetokiluma taidei maita-nai wagaine anafaiweya, aku tufodi ikiviladi taidei anafaiweya. “Biyavo-dina Yeisu anavaleya iwakana iawaawamogatalena kaliva wagaidiya.”

ebafwaiki teni.** Yana ebafoaiki seyana seyana wagaidiya ani kedukedu kaikaiwabuna vaita kini adiveigavu anafaiweya gimiyamiya, ada kuluwana seyana seyana wagaidiya ani yegana vona awadamana Yaubada faina gimiyamiya.†

² Kevekeva lakaina manimanini-moena gaitana ani anaita vaita kevakeva-nai ivewagana lepadi.** Aku agena vaita kevakeva beya** agena anafaiweya, aku awana ani lakaina wa nigona manamanawedi ke manimaninidi, vaita laiyoni anafaiweya. Ada kevakeva-nai lakaina wagaine e au bana umala-nai gisedamanena yana toyogina, anaivi veimeya faina, ada kaduwe yana veimeya lakaina, e ada wagaidiya kevakeva gina veimeya.

³ Ada kevakeva lakaina manimanani-moena kuluwana adiseveni wagaidiya, ani seyana anaita vaita gida gilagi ada gida alika, aku anakima-nai wagaine gida alika ani bademowa gibwaina. Ada babi matatabuna anatomya meyadi gisidobodobona kevakeva lakaina manimaninina faine ada imuliyena.

⁴ Ada ioduodu umala wagaine, faina yana veimeya gisedamanena kevakeva-nai lakaina manimaninina wagaine. Ada kadu ioduodu kevakeva lakaina manimaninina wagaine, ivona, “Keke tamo gaito wa yana toyogina anafaiweya

** **13:1** Buki Tabu wagaine ebafoaiki ani toyogina anaiyaiyaya, kai kaliva totoyogina o kai ebafeimeya toyogina. † **13:1** Ive 17:3,7-12 ** **13:2** Bana kevakeva ‘lepadi’ ani vaita fusi walawala anafaiweya aku lakai-moena ke manimanini-moena. ** **13:2** Kevakeva-dina ivewagadi ‘beya’ ani agedididi lakaidi kadu wavu-tuvutudi, ada nimawakadi manamanawedi ke manimaninidi.

taide kevakeva-nai lakaina manimaninina. Gaito anafata gina lugaviyana?"

⁵ Aku kevakeva lakaina manimanini-moena ani wa anaawaega ke yana vona wagaidiya tauna gikikilakaina kadu awane vona awadamana givonavonayena. Ada vaikoi foti tu (42) wagaidiya wa ana awaega kaliva giveiveimeyedi.

⁶ Bana kevakeva manimanini-nai gimididi ada Yaubada givona awadamanena. Yaubada anayegana kadu Yaubada yana ebamiya givona awadamanedi, taine yana ebamiya tabutabuna-nai wagaine badi gabameya imiyamiya.

⁷ Kaduwe wa anaawaega ke Yaubada yana kaliva tabutabudiyavo gina lugaviyadi ada gina toyogisegedi.† Ada anaawaega ke kaliva matatabuna gina veimeya wagaidiya, badi gavega yoo seyana seyana wagaidiya, badi meya seyana seyana wagaidiya, kadu badi imiyamiya babi anafafali seyana seyana wagaidiya.

⁸ E, ada babi anakalivayavo moyaidi ina oduodu kevakeva lakaina manimaninina wagaine, biyavo-dina adiyegana keke ida miyami Yawai anaBuki† wagaine. Taine buki-nai ani Banae Lami yana buki, Banae kaliva iluvealikana.† Buki-nai wagaine, tuwai-bulubuluna muliya-yo babi anaibubuna vaguvagu, ani Yaubada yana kalivayavo adiyegana givetokilumidi, badi yawai-vagata ina nuwagana.

⁹ Banae wa tagana ani vona taidei gida nogalina.

† 13:7 Dan 7:21-22 † 13:8 Ive 20:12 † 13:8 Iyo 1:29, Gug 2:23

¹⁰ Kai tamo gaito inavai inasena deli wagaine aga ginaluku deliya gina miyamiya. Ada kai tamo gaito ina luvealikana benisi wagaine aga benisi wagaine ina luvealikana. Taidei nuwanuwa-nai faine Yaubada yana yoo tabutabudiyavo, ani gilubodadi wa yadi atuvefaila ina midimididi toyogina ada nuwadi ina sevelavelalaina Yaubada anavetumagana wagaine.

Kevakeva lakaina manimaninina anavelu giyegemona babi wagaine-deya.

¹¹ Aku kadu kevakeva lakaina manimaninina seyana gaitana giyegeyegemona babi wagaine. Yana ebafwaiki iluwei vaita lami anafaiweya, aku giifufu vaita umala lakai-moena wa ofana anafaiweya.

¹² Bana kevakeva manimaninina nagona yana veimeya matatabuna givele vedamana kevakeva anavelu wagaine,** e ada tauna yana faisewa bana kevakeva anavelu gina vevefaisewana faine. Ada banae yana veimeya-nai givai givefaisewana. Ada kaliva moyaidi giluluyayalidi ke ioduodu kevakeva-nai nagona wagaine, banae-nai nagona vaita gida gilagi ada gida alika aku anakima-nai wagaine gida alika ani gibwaina.

¹³ Ada kevakeva anavelu iyaiyaya ebameyasi-dobodobo ke ebanuwayaudi moyaina gifaifaisewadi, aku iyaiyaya seyana lakaina ani aiyabeyabela giveimeyena ke wagabameya-deya giobu

** **13:12** Bana kevakeva lakaina manimaninina nagona ani giyegemona leyageya, aku bana kevakeva lakaina manimaninina anavelu ani giyegemona babi wagaine.

babi wagaine, e ada au anafaiweya giyegemona kaliva matadiya.

¹⁴ Bana kevakeva anavelu iyaiyaya-dina gifaisewadi ani bana kevakeva nagona anayeganeya gifaisewadi, ada yana vefwayafwaya-nai wagaine babi anatomiyayavo gifwayanegenegedi. Kaduwe kaliva givonedi, givonaga, “Imi moyaimi ani kilumina wana bubuna vaita kevakeva manimaninina-nai anaita anafaiweya, banae benisi wagaine imununa vaita gida alika aku au wayawaina.” Taide anafaiweya givona, e ada kilumina ibubuna au vaita kevakeva manimaninina nagona anaita anafaiweya.[†]

¹⁵ Ada kilumina-nai ibubu giavaina, kevakeva-nai manimaninina anavelu ani wa anaawaega yawai givedamana kilumina-nai wagaine e ada bana anafata gina ifufu. Aku biyavo-dina gavega keke ina oduodu kilumina wagaine, ani bana gina veimeya ke kaliva-dina ina luvealikadi.

¹⁶ Kadu kevakeva anavelu ani giveimeya vaita kaliva matatabuna aditalakili ina vaina nimadi aiyatagidi wagaidiya o kai debafoudiya. Kaliva wayeganidiyavo ada kaliva keke wa adiyegana, kaikaiwabudiyavo ada fanifanidiyavo, badi togugai yogoyogodi ada badi keke togugai yogoyogodi, matatabudi talakili ina vaina.

¹⁷ E ada gavega keke wa aditalakili-nai ani keke adifata tamo gavana ina kimone o kai ina vekimoneye. Taide talakili-nai ani kevakeva lakaina manimaninina anavelu anayegana o kai anayegana ananaba.[†]

[†] **13:14** Mad 24:24 [†] **13:17** Ive 14:9-12

18 Tubuiyakuweyavo, kai nuwanuwami wana alamanena taidei vona-nai ananuwanuwa, aga gilubodami yami nuwauya nodi wana nuwanuwayena. Biyavo-dina nuwadi mamalina ani kevakeva-nai manimaninina yana naba anakivila ida nuwanuwayena ke ida inanana, faina naba taidei ani kaliva yana naba. Yana naba-moena ani sikisi sikisi sikisi.

14

Banae Lami ke anatomuliya wani analedi foti-fowa tausani (144,000).

¹ Ada gaitanau ani gaitana Bana Lami gimidimididi Oya Saiyoni wagaine, ada kaliva ke vevine ani 144,000 ikwayabuna, badiyavo Lami anayegana ke Tamana anayegana imiyamiya debafoudiya.[†]

² Ada bonadi wagabameya-deya ganogalina, ananogala vaita wayagata gida lunununga anafaiweya,[†] kadu vaita atala gida luwatala anafaiweya. Kadu ananogala vaita kaliva api ida veneganegayedi.

³ Taine kaliva-dina adiyoo 144,000, ani kweli evaguna ikweliyena Yaubada yana veimeya anaebavetoga kaikaiwabuna debaine, kadu gaitoma wayawaidiyavo adilaufuli ada tomiya gabama aditonagonayavo debaidiya. Kweli-nai ani keke tamo gaito anafata gina galuvaluva aku badi 144,000[†] gagana, badiyavo Yaubada gitutuveobudi babi taidei anamiya koyona wagaine-deya.

[†] 14:1 Ive 3:12, 7:3 [†] 14:2 Ive 1:15 [†] 14:3 Ive 7:4

⁴ Biyavo-dina ani keke tamo tova vevine nodi ida dauda e ada taudiyavo ida kivebwanenedi,** faina tova matatabuna taudiyavo iawaawatadi. Ada Bana Lami imulumuliyena e ada gadamamu ginanau, au badi nodi. Taidei yoo-dina imiyamiya babi anakalivayavo adimwatuguya aku Yaubada gitutuveobudi badi wagaidiya-deya, e ada biyavo-dina vaita bavagu anaguwa nagona† Yaubada ke Lami faidiya.

⁵ Badiyavo keke maita ida vefwayafwaya, ada keke tamo gavakoyona wagaidiya ayo kaliva adifata ina awavekoyoyedi.

Aneloseyavo aditoto yadi matawa.

⁶ Aku matakau ginau ani gaitana kadu anelose seyana giyaveyavega mwatuguya, ani valeya iwakana gimiyamiya-vagata gialiyena ke gina awamogatalena gavega imiyamiya babiya. Badiyavo imiyamiya fafali seyana seyana wagaidiya, unuma seyana seyana wagaidiya, yoo seyana seyana wagaidiya, kadu iifuifufu meya seyana seyana wagaidiya.

⁷ Bonana lakaina wagaine givonavona, “Yaubada wana matausena ada anayegana wana kilakaina, faina yana tova-nai lakaina wagaine kaliva gina vevonayavugidi ani bademowa giyegemona. Wana oduodu wagaine, Banae gabama, babi, leyaga, ada gufa tovoga moyaidi gibubudi.”

** **14:4** Taide dewa-nai ani vona matalivulivuna. Anaalamana vaita badi 144,000 ani Yaubada gaga imuliyena. Keke yaubada fwayafwaya wagaidiya ida oduodu. † **14:4** Iyem 1:18

⁸ Ada kadu anelose anavelu gimuliyena anelose-nai nagona ada givonavona, “Gibeu! Gibeu! Melala Babiloni wa anayegana lakaina gibeu!† Waitana, badi babi matatabuna anayoo tulina tulina gigadi ke vovo anaawaega-kavokavovo ananuwanuwa itaitaluvadigadi au nuwadi givai-moedi. Ee, vaita waini giveledi kaliva iyuga ivekwavakwava e ada taudiyavo iawaegedi taide yana dewa-nai koyo-moena wagaine.” **

⁹ Aku kadu anelose anaveto ani anelose nagona ke anelose anavelu gimuliyedi, ada bonana lakaina givonavona, “Badi gavega kevakeva-nai anavelu ke anakilumina ina oduodu wagaidiya, kadu yana talakili ina vaina debafoudiya o kai nimadi aiyatagidiya,

¹⁰ ani velemono Yaubada yana nuwakoyo lakaina ina lutovonina. Taidei nuwakoyonai ani vaita waini toyogi-moena giiwana veiya anafaiweya, ada badi inayuna yana nuwakoyo anavei wagaine ani ai alalata ke salufa ina yegemona wagaidiya. E ada wa yadi uloulolo lakaina ina miyamiya badi Yaubada yana anelose tabutabudiyavo debaidiya, kadu Bana Lami debaine.

¹¹ Ada aiyabeyabela wagaine adiuloulolo inuwanuwagana ani ai siyona gilakalaka-vagata,

† **14:8** Ive 18:2-3 ** **14:8** Taide vona-nai ‘vovo anaawaega-kavokavovo’ ani anelose-nai givonaluvefosau kaliva yadi dewa-nai ioduodu yaubada fwayafwaya wagaidiya. Adilauboda Yaubada anakaibe-mowa wagaine ida oduodu, e aku aiyada yaubada fwayafwaya wagaidiya ioduodu. Ada Yaubada matane ani wada vaita iudoudo anafaiweya.

keke gida avaavai. Ee, badi gavega ioduodu ke-vakeva anavelu ke anakilumina wagaidiya, ada kadu anayegana yana talakili ivaina ani taide adiuloulolo-nai faina, keke tamo yadi veyawai yadayada o kai bogi.”

12 Taidei nuwanuwa-nai faine Yaubada yana yoo tabutabudiyavo, ani gilubodadi wa yadi atu-vefaila ina midimididi toyogina, badi Yaubada yana veimeya iitaitaveyabina ke yadi vetumagana Yeisu wagaine iabidonena ani kaliva-dina.

13 Ada bonabona wagabameya-deya ganogalina, givona, “Taidei anafaiweya una vetokiluma. Malinai kadu ginanau ee gavega yada Kauveya Yeisu wagaine imiyaveyalata analaba ina alika, ani Yaubada gina awanuwakabubuyedi.”

Taidei anafaiweya bonabona-nai givona ada Bana Aluwaluwa Tabuna givona, “Ika vona velemono. E ada ina veyawai yadi gugai wa anavita wagaidiya.[†] Faina yadi gugai guwadi nodi inalaka gabameya ke adilaufata iwakana ina nuwagana.”

Babi yana bavagu.

14 Aku matakū gināu ani buibui kwayak-wayana gaitana, ada buibui-nai tabone seyana gaito anaita vaita kaliva natuna seyana anafai-

[†] 14:13 Ibel 4:10

weya.** Ada kuluwane tovetoyogina adikeduku kaikaiwabuna ibubuna gola wagaine gimiyamiya, kadu kwasikwasi akauwana manimaninina nimane, taine witi anabavagu faine.

¹⁵ Ada kadu anelose seyana giyegemona manuwa tabu gabama-deya, ada givedou moiyalina banae buibui tabone givetovetoga wagaine, givona, “Ya kwasikwasi akauwana una lubibiye una idaba, faina bavagu anatova ani bademowa. Babi anabavagu giboyala.” †

¹⁶ E ada bana givetovetoga buibui wagaine, ani yana kwasikwasi akauwana gilubibibiyena babi getane ada babi anabavagu givaina.

¹⁷ Ada kadu anelose seyana giyegemona manuwa tabu gabama-deya, banae kaduwe kwasikwasi akauwana manimaninina nimane.

¹⁸ Kadu anelose seyana banae ebavebolavoinai ana ai alalata anatoitaveyabina, ani giyegemona ebavebolavoi wagaine-deya. Ada givedou bonana lakaina anelose-nai wa yana kwasikwasi akauwana manimaninina wagaine, givona, “Ya kwasikwasi akauwana unavai una lubibibiyena ke gileifi dibulidi kakaidi una idaba, ada gileifi una vagauwidi babi anabulava wagaine-deya. Bademowa gileifi-dina iboyala.”

¹⁹ Au bana anelose yana kwasikwasi akauwana

** **14:14** Taide vona-nai ‘seyana gaito anaita vaita kaliva natuna seyana anafaiweya’, ani anainana anafaiweya falofisai seyana Daniela 7:13 wagaine, wadedeku Daniela gifalofisai Keliso faine. Anainana taide maita-nai wagaine, ani taide anafaiweya ive-tokilumina ke kaliva gina kivenuwaudududi falofisai-nai Daniela wagaine. † **14:15** Iyol 3:13, Mad 13:36-43

gilubibibiyena babi getane, ada babi matatabuna anagileifi anabavagu givagauwina. Ada gibatugena ke giluku gileifi adiebavagafuwa lakaina wagaine. Taine 'gileifi anaebavagafuwa' ani ivonaluvefosau Yaubada yana nuwakoyo lakaina wagaine, vaita ebavagafuwa ananuwanuwa ani Yaubada yana nuwakoyo lakaina anaebanuwaga tokoyona faidiya.

²⁰ Ada gileifi-dina ivagadi ebavagafuwa-nai lakaina wagaine melala-nai Yelusalema wamelaya, ada dayaga giyegemona ebavagafuwa wagaine gimadu gilaka, ani analakalaka anafaiweya osi awane anaetowava ada ginau anaatuwada kilomita teli analedi (300) anafaiweya.

15

Gabama anaanelose adiseveni wa yadi vita koyo-moedi adiseveni.

¹ Aku matak u ginau ani kadu iyaiyaya seyana gaitana gabama wagaine, bana ebavetataweyana kadu ebameyasidobodobo. Anelose adiseveni ani vita koyo-moedi adiseveni ikiveyabidi. Taide vita-dina ani vita koyo-moedi adiebalauyabu, faina yadi kivekoyo ina luyabu wagaine, Yaubada yana nuwakoyo tokoyona wagaidiya ani anamatatabuna gina luyabuna.

² Ada seyana gaitoma gaitana vaita lavu niwaniwalovina aku wada velemono ani kelasi, ada aiyabeyabela nodi ilomwanina. Ada biyavo-dina kevakeva lakaina manimaninina anavelu wa anakilumina itoyogisegena, kadu keke ida awaega ke anayegana ananaba inavai, ani

imidimididi tabone. Ada seyana seyana ni-madiya ani api Yaubada giveledi.

³ Aku kweli-nai tuwaina Yaubada yana togugai Mosese gikweliyena,[†] kadu kweli-nai Bana Lami gikweliyena, ani badi ikwelikweliyena, taide anafaiweya.

“O Kauveya Yaubada, Totoyogi-vagai,
Ya gugai matatabuna ani lakai-vagaidi kadu
ebameyasidobodobo.

Oye yoo tulina tulina adi Toveimeya, badi
imiyamiya babi anafafali moyaidi wa-
gaidiya,
ada Ya veuluva ani tunutunugina ada vele-
moena.

⁴ O Kauveya, kaliva matatabudi wa yadi
matauta ina vemoimoineni
ada ayegana ina kilakaina.

Faina O akai-be-mowa tabutabu ada
Ya nuwanuwa matatabuna ani yegayega-
vagaidi.

Fafali tulina tulina adiyoo babi matatabuna
wagaine inaelai

ada ina oduodu wagainiya,
faina Ya gugai tunutunugidi useyegemonedi
ke aitaitadi.”

⁵ Ada ikweli giavaina, maku ginau
Yaubada yana manuwa sinininila tabutabuna
ebaawavelemoena gabameya, ani negenine
gaitana Tutulagolota Tabutabu-moena

[†] 15:3 Iyeg 15:1, 2Vei 31:30 - 32:43

yavuyavuna.**

⁶ Ada Tutulagolota-nai wagaine anelose-dina adiseveni iyegemona wa yadi vita koyo-moedi nimadiya. Adinuya ani yegayega-moena ke kadu kwayakwaya-moena, ada adibeleta manawadiya ibalawalilivuga ani ibubudi gola wagaine.

⁷ Ada gaitoma-dina wayawaidiyavo adilaufuli wagaidiya, ani seyana nauwa gola adiseveni givedi anelose-dina adiseveni seyana seyana. Taide nauwa-dina ani Yaubada yana nuwakoyo lakai-moena givemagadi, Banae gimiyamiya-vagata ke vagata.

⁸ Ada manuwa tabu gimaga-mowa siyo wagaine, siyo-nai Yaubada yana iwakana mamalina kadu yana toyogina adiiyaiyaya. E ada keke tamogaito anafata ginaluku manuwa tabu-nai wagaine, analaba aneloseyavo adiseveni yadi vita koyo-moedi adiseveni adietoiwaga iluyabu.

**** 15:5** Manuwa sinininila tabutabuna-nai, ani tova tuwai-moena Yaubada Mosese giveimeyena ke meIsileli iyogona yadi tova iwaliwalinau fafari kavovona wagaine. Wada Yaubada yana ebamiya badi adimwatuguya, ada kaduwe manuwa sinininila tabutabuna-nai wagaine meIsileli yadi vebolavoi ialialiyedi ke ina oduodu Yaubada wagaine. Manuwa sinininila tabutabuna-nai ivewagana 'manuwa sinininila tabutabuna ebaawavelemoena', faina negenine kabala beyabeyadi iluwei imiyamiya, kabala-dina iawavelemoenayena Yaubada yana veyavo anawai nagona gimiyamiya. (Iyeg 31:18) Manuwa sinininila-nai tabutabuna ebaawavelemoena ani ivegugaiyena malamala fowa analedi foti (440) anafaiweya, analaba Solomoni yana toveya manuwa-mowa tabutabuna iyogona. Ada manuwa sinininila tabutabuna ebaawavelemoena ke aimo manuwa-mowa tabutabuna ani adivegugai seyana. (Iyeg 25:9, daba 26, 27, 35-40, Naba 1:50-54, Ibel 9:1-28)

16

Nauwa adiseveni Yaubada yana nuwakoyo lakaina givemagadi.

¹ E aku bonabona lakaina ganogalina giyegemona manuwa tabu wagaine, ani givona anelose adiseveni wagaidiya, givonaga, “Wananau ada Yaubada yana nuwakoyo lakai-moena wa nauwadi adiseveni ani wana biwana babi wagaine.”

² Ada bana anelose nagona gina yana nauwa gibiwana babi wagaine. Ada badi kaliva-dina kevakeva lakaina manimaninina yana talakili wagaidiya, kadu anakilumina wagaine ioduodu, ani koliya koyo-moedi wa ulolodi ivaidi.

³ Aku anelose anavelu gina yana nauwa gibiwana leyaga wagaine. Ada tova-nai wagaine leyaga gisevedavedama ada givedayaga vaita toalika dayagina anafaiweya, e ada gavana wayawaina leyageya gimiyamiya ani seyana seyana ialika. Keke tamo gavana aimo wayawaina gida miyami leyageya.

⁴ Aku anelose anaveto gina yana nauwa gibiwana gufa wagaidiya ada tovoga wagaidiya, ada gufa-dina ivedayaga.

⁵ Aku kadu anelose seyana, banae anaveimeya babi matatabuna anagufa moyaidi gina itaveyabidi, ani ganogalina givona,

“Oye Totunutunugina. Tova malinai
O umiyamiya kadu tova tuwaina O
umiyamiya.

Oye tabutabu. Ya nuwanuwa matatabuna
ani yegayega-vagaidi. Taidei faina
biyavo-dina yadi dewa koyodi faidiya
uvevonayavugidi tunutunugina ke
adilaufata usedi wagaidiya.

⁶ Faina badiyavo O ya yooyavo tabutabudi
ke badi ya falofitayavo ani iluvealikadi ke
dayagidi gimadu.

E ada malinai keke tamo gufa faidiya aku au
dayaga uveledi inayuga. Taine adilauboda
anafaiweya.”

⁷ Ada ebavebolavoi wagaine bonabona giyege-
mona ani ganogalina givonavona,

“Tka, Kauveya Yaubada, Oye Totoyogi-vagai.
Ya venuwadadana kaliva adilaufata faina
ani nuwanuwa velemono ke tunutunug-
ina.”

⁸ Ada givona giavaina, anelose anavelaufuli
yana nauwa gibiwana kauwana wagaine, ada
kauwana wa yana ginaginana lakai-moena kaliva
gialaidi vaita ai anafaiweya.

⁹ Ada kaliva ginaginana-nai toyogina
wagaine gialaidi, au Yaubada anayegana
ivona awadamanena, Banae-nai yana veimeya
wagaine taide vita-dina koyo-moedi iyegemona
badi wagaidiya. Keke ida nuwaviyadi yadi
dewa koyodi wagaidiya, ada keke Yaubada
ida awadavadava.

¹⁰ Aku anelose anavefaifi yana nauwa gibi-
wana kevakeva lakaina manimaninina yana

veimeya anaebavetoga kaikaiwabuna wagaine, ada maduga-mowa bana yana fafali-nai wagaine giveiveimeya, ani anamatatabuna yuyuvana gikiwafina. Ada anakaliva nigodi ialaegedi adiuloulolo lakaina wagaine,

¹¹ aku Yaubada gabama wagaine anayegana ivona awadamanena adiuloulolo ke adikoliya faidiya. Keke ida nuwavila yadi dewa-dina wagaidiya.

¹² Aku anelose anavesikisi yana nauwa gibiwana gufa-nai lakaina anayegana Yufeleitisi wagaine, ada anagufa matatabuna gialina. Gialina ke wai gina kidewedewena e ada kiniyavo adifata inaelai kauwana yana ebalaka anafafali wagaine-deya.

¹³ Au aluwaluwa bwanebwane nedi aditoto adiita vaita kalakala anafaiweya ani gaitadi. Seyana giyegemona bana umalanai koyo-vagina awana wagaine-deya, kadu seyana giyegemona bana kevakeva lakaina manimaninina awana wagaine-deya. Ada kadu seyana giyegemona bana falofita fwayafwaya** awana wagaine-deya.

¹⁴ Taide aluwaluwa koyodi-dina aditoto ani gugai ebameyasidobodobo ifaifaisewadi ke kaliva nuwadi ina vaina. Ada inau babi matatabuna anakiniyavo wagaidiya ke ina vagauwidi inaelai gaviya wagaine. Taine gaviya-nai lakai-moena gina yegemona Yaubada Totoyogi-vagina yana yadayada lakaina wagaine.

** **16:13** Bana falofita fwayafwaya-nai ani kevakeva lakaina manimaninina anavelu. (Ive 13:11)

15 Aku yada Kauveya Yeisu givona, “Wana nogalina. Iya ganaelai vaita tokiyafu yana ela anafaiweya, e ada yaku ela wagaine kaliva yaudi gina lovoga.† Gavega keke ida dauda aku itoletole Iya faikuya kadu adinuya iose-vagaidi,** ani Yaubada gina awanuwakabubuyedi. E ada keke vaita konekoned i anafaiweya ina nunudadana, ke wa yadi vovomumu aku kaliva ina itavutuvutu.” Taide anafaiweya Yeisu yana ifufu.

16 Aku aluwaluwa koyodi toiye ani inau ada kini-dina ivagauwidi ke fafali seyana wagaine ivagauta. Fafali-nai meIsileli bonadiya ivewagana Amagedoni.**

17 Aku anelose anaveseveni yana nauwa gibi-wana mwatugu wagaine, ada manuwa tabu wagaine-deya bonabona lakaina giyegemona Yaubada yana veimeya anaebavetoga kaikai-wabuna wagaine, givona, “Bademowa giavaina!”

18 Ada atunama iatunama, ada atala giluwatala, ke butuna gilunununuga, kadu mabibi lakai-moena gimadu. Tuwai-bulubuluna-deya tova-nai Yaubada kaliva gibubuna ke gielai malinai tova-nai, keke tamo mabibi anafaiweya gidamadu.

† 16:15 Mad 24:43-44, Luk 12:39-40, Ive 3:3 ** 16:15 Vona-nai ‘adinuya iose-vagaidi’ ani vonaluvefosa, ada ananuwanuwa ani yadi dewa iitaitaveyabidi ke ina dewadewa yegayegana e ada keke tamo gaito anafaiweya gina awavekoyoyedi ke gina kivevovomumudi. Faina Yaubada yana kalivayavo adilauboda ina miyamiya wa yadi kidewadewa yana ela faine. ** 16:16 MeIsileli bonadiya yegana-nai ‘Amagedoni’ anakivila ani ‘Megido Oyana’. Wadedeku-deya tova tuwai-moena meIsileli gaviya moy-aina ilugaviyadi. (Tovei 5:19, 2Kin 23:29-30)

¹⁹ Melala-nai lakaina anayegana Babiloni** ani yana babi giluyavalina fafali toiye, kadu yoo tulina tulina imiyamiya babi anafafali moyaidi wagaidiya, ani mabibi-nai yadi melala lakaidi giluyaweyawelidi. Ada melala-nai Babiloni wa anayegana lakaina ada anakalivayavo wa yadi koyona moyaina igugugaiyedi, ani Yaubada keke gida venuwawuluye. E ada waini wa veina giveledi inayuna. Taine waini-nai ani Tauna yana nuwakoyo lakai-moena, ada yana veimeya wagaine iyuna.

²⁰ Ada imula seyana seyana gibwavi, ada kadu oya ani keke tamo kaduwe adiebaita gida miyami yadi ebamiya wagaidiya.

²¹ Ada wei matadi tubutubudi iveaisi ani iobuobu wagabameya-deya, wada vaita kabala ke kaliva ifiyafiyadi. Seyana seyana anavita ani kilo foti faifi (45) anafaiweya. Ada kaliva ivona awadamana Yaubada wagaine, faina wei matadi tubutubudi iveaisi ani gikikivekoyodi. Faina vita-nai koyo-moena ani lakaina kadu koyo-moena.

17

Tosedada lakaina anavemataavuloga koyo-moena ginuwagana.

¹ Aku anelose adiseveni nauwa adiseveni iwaidi, ani seyana wagaidiya gielai wagaikuya

** **16:19** Iyoni melala-nai lakaina giveyeganina 'Babiloni' aku vemoena givonaluvelofosau melala lakaina Loma wagaine, faina keke nuwanuwana Loma anayegana gina inana.

ada givona, “Unaela gana vewaleni vematavuloga-nai Yaubada gina vena vavine sedasedadana valeyana lakaina,** banae givetovetoga gufa moyaidi lilivadiya.**

² Bana mine-nai sedasedadana wagaine babi anakiniyavo iela nodi vovodi iawaegge-kavokavovodi.** Kaduwe vavine tauna vovona iawaegge-kavokavovona wagaine, babi anakalivayavo moyaidi nuwadi givaina e ada vaita waini wagaine idayuga kwavakwava.”

³ Aku Aluwaluwa Tabuna wa yana toyogina gielai wagaikuya aku anelose-nai giabiku gin-auweku fafali kavovona wagaine. Wadedeku gaitana vavine seyana givetogana kevakeva lakaimoena yabeyabelina wagaine. Kevakeva-nai kuluwana adiseveni ada ebafwaiki teni, ada yegana vetovetokilumidi vovona matatabuna ikiwafina, yegana-dina koyodi Yaubada ivonavona awadamanena.

⁴ Vavine ananuya ani adiita iwakadi velemoena, adikala ani vaita kiniyavo adinuya

** **17:1** Buki Tabu anatoalamana tufona moyaidi ivetumagana vaita taidei mine-nai sedasedadana ananuwanuwa, ani velemoena melala-nai lakaina anayegana Babiloni, ada Babiloni ani vonaluvefosa melala-nai lakaina Loma. ** **17:1** Vona-nai ‘gufa moyaidi’ ananuwanuwa faina ani una itana 17:15.

** **17:2** Taide vetokiluma-nai Ivemogatala wagaine, vona-nai ‘nodi vovodi iawaegge-kavokavovodi’ ani ivonaluvelofosau kaliva taudiyavo nuwainagediya ioduodu-mowa gaitoma tulina tulina wagaidiya aku Yaubada ani keke. Taidei dewa-nai ani Yaubada yana vona wagaine givonaluvelofosena ‘udo’, faina yana yoo adilauboda ani taudiyavo ida awaegedi Banae wagaine, aku aiyada yaubada fwayafwaya wagaidiya ioduodu. (Iyel 3:8-9, 5:7, 9:2, 13:27, Isik 16:1-63, 23:37)

anafaiweya, pepolo ada yabeyabelina. Ada gaitoma lunamanamalidi wagaidiya tauna giveiveigavuna, gola wagaine, kabala adikala tulina tulina adiita vewaga velemoena, ada ododo fatadi lakaidi. Ada vei ibubuna gola wagaine giabina, aku vei-nai ani gimaga mine-nai tauna yana dewa koyo-moedi moyaidi, kadu vovona anaawaenge-kavokavovo anabwanene ani wagaidiya.

⁵ Ada debafoune yegana seyana vetovetokilumina gimiyamiya, ananuwanuwa vitana vaita isewavuyena anafaiweya. Taide anafaiweya givona,

Ida Babiloni wa anayegana lakaina!

Banae ani tosedada moyaidi aditonagona.

Velemoena, mine-nai ani babi anakoyona matatabuna vuvudi.

⁶ Bana vavine gaitana ani vaita gufa toyogina giyuga ke givekwavakwava. Aku gufa-nai taidei ani Yaubada yana kaliva tabutabudiyavo dayagidi kadu biyavo-dina Yeisu valeyana iawaawatalatalainena dayagidi, faina bana mine-nai giluvealikadi. Ee, vavine gaitana wagaine meyaku gisidobodobona velemoena.

⁷ Aku bana anelose givoneku givona, "Gavaiyamu-yo meya gisidobodobo? Banae vavine-nai kadu kevakeva-nai koyo-moena wa kuluwana adiseveni ke yana ebafwaiki teni, ani bana mine-nai giwaiwaina, ani ganavona faidiya. Adinuwanuwa ani sewasewavuyena, aku gana kivemalina wagainiya.

8 Taide kevakeva-nai koyo-moena uitana ani tuwaina wayawaina gimiyamiya, aku malinai keke. Aku au tova kabisona gina lakayegemona olu keke wa anaebalauyabu wagaine ke anaagolaufofola gina nuwagana. Tuwai-bulubuluna muliya-yo Yaubada babi gibubuna anatoveya, kaliva-dina aimo yawai-vagata ina nuwagana ani adiyegana Yaubada givetokilumidi Yawai anaBuki wagaine. Aku babi anakaliva-dina badi adiyegana keke Yawai anaBuki wagaine, ani kevakeva-nai ina itana wagaine yaudi gina lovoga. Faina kevakeva koyo-moena tuwaina wayawaina gimiyamiya, aku malinai keke, aku aimo kadu gina miyamiya.

9 “Tubuiyakuweyavo, kai nuwanuwami wana alamanena taidei vona-nai ananuwanuwa, aga gilubodami yami nuwauya nodi wana nuwanuwayena. Kuluwana adiseveni anaalamana ani oya adiseveni tabodiya vavine givetovetoga.

10 Aku kadu ananuwanuwa seyana, ani kuluwana seveni-dina taine kini adiseveni. Ada kini-dina wagaidiya ani adifaifi bademowa adiivi-nai giavaina, bana anavesikisi malinai giveiveimeya, ada bana anaveseveni aimo keke gida vekini. Aku aimo tova gielaelai wagaine banae anaveseveni gina vekini, aku tova maufona analauboda wagaine ginamiya.

11 Aku bana kevakeva koyo-moena tuwaina wayawaina gimiyamiya aku malinai keke, ani au kini-dina adiveseveni adiyoo anakaliva, aku gina vekini anaveeita. Aku anaagolaufofola gina nuwagana.

¹² Aku ebafwaiki teni uitadi ani badi kiniyavo teni aimo keke vekini anaveimeya ida nuwaga. Aku aimo badiyavo ani kevakeva-nai koyo-moena nodi vekini anaveimeya ina nuwagana, aku keke tova manamanawena, au kauwana anabai seya-moena gaga wagaine.

¹³ Kini teni matatabudi yadi nuwanuwa seyana wagaine, ani yadi toyogina kadu yadi veimeya ina atuegena kevakeva koyo-moena wagaine.

¹⁴ Biyavo-dina Bana Lami ina lugaviyana aku Banae gina toyogisegedi, faina Banae kauveyayavo yadi Kauveya ada kiniyavo yadi Kini. Ada yoo-dina Banae nodi ani Tauna yana kalivayavo givenuwadadanedi ke gidouwedi, ada badi tova moyaina wa yadi idibumwaiga imulimuliyena.”

¹⁵ Kaduwe anelose givoneku, givona, “Gufa moyaina uitadi ani wagaidiya vavine sedasedadana givetovetoga, wada kaliva moyaidi imiyamiya yoo tulina tulina wagaidiya, babi anafafali tulina tulina wagaidiya, kadu meyadi tulina tulina.

¹⁶ Kevakeva-nai koyo-moena yabeyabelina ada ebafwaiki teni uitadi ani vavine sedasedadana ina agougena, ada gaitoma matatabuna vovona wagaine ina veyalilidi aku ina nuyabuyabuna. E ada au anakaiibe konekonena ginamiya. Aku muline vidona ina kanina, ada gavana ginatufo ani aiyabeyabela wagaine inakabu-yabuna.

¹⁷ Tainei dewa-nai kiniyavo ina dewayena, faina Yaubada yana nuwanuwa gisena aseasediya e ada ina gugaiyena. Matatabudi yadi nuwanuwa seyana wagaine Yaubada yana

nuwanuwa imuliyena, ada ina awaegau ke vekini anaveimeya taudi wagaidiya ani ina atuegena kevakeva-nai koyo-moena wagaine, e ada banae gina veiveimeya analaba Yaubada yana vona givonaye-vagaidi ina yegemona velemono.

¹⁸ Ada bana vavine-nai uitana, wada melala lakaina wa anayegana giveiveimeya babi matatabuna anakiniyavo wagaidiya.”

18

Melala lakaina Babiloni wa anayegana lakaina ani gibeu.

¹ Taidei gaitoma-dina mulidiya, matakú ginau ani kadu anelose seyana gaitana giobuobue-lai wagabameya-deya. Banae wa yana veimeya lakaina, ada yana iwakana mamalina wagaine babi matatabuna gituimalina.

² Ada bonana lakaina wagaine givona,

“Gibeu! Gibeu! Melala Babiloni wa anayegana lakaina gibeu!†

Ada malinai fafali-nai ani kakawana e ada aluwaluwa koyodi imiyamiya wagaine, kadu give ebaga manuga ke kevakeva bwanebwane-nedi faidiya, gaitoma-dina kaliva igadibudibusoyogedi.

³ Gibeu faina banae babi anakaliva adiyoo tulina tulina moyaidi gigadi, ke vovo anaawaega-kavokavovo ananuwanuwa itaitaluvadigadi au nuwadi givai-moena. Ee, vaita waini giveledi iyuga ivekwavakwava e ada taudiyavo

† 18:2 Ive 14:8

iawaegedi taide yana dewa koyona-nai wagaine.

Ada babi anakiniyavo inau Babiloni nodi vovodi iawaege-kavokavovodi. Ada vavine-nai tova moyaina ginuwanuwa vekaikaiwabu faina ada gaitoma moyaina gikimokimoned, e ada tovekimone moyaidi babiya ivekaikaiwabu-mowa mine-nai yana fata anaiwakana wagaine.”

⁴ Taide anafaiweya anelose-nai givona aku kadu bonabona seyana wagabameya-deya ganogalina, givona,

“Yaku kalivamomo, melala-nai wana segena aenanai imi kadu badi nodi yadi koyona wana gugugaiyedi, e ada anavita-dina koyo-moedi ina yegemona badi wagaidiya ani imi kadu wana uloloyedi.

⁵ Faina yadi koyona givelakavi gilaka gabama wagaine, ada Yaubada keke nuwana gidavulu koyona-dina igugaiyedi.

⁶ Dewa-dina Babiloni gifaisewadi kaliva wagaidiya ani inayewa tauna wagaine, aku vita-moena veleemoena waluvefofona. Ee, banae vei seyana wagaine yana dewa koyodi gikidewedewena kaliva faidiya anafaiweya, ida bana yana tova tauna yana vei iluwei imaga anavemataavuloga wagaidiya ginayudi.

⁷ Tauna gikikilakaina ada yana dewa moyaina wagaidiya ani keke maita tauna gida awaawata, aku gavana nuwanuwana

ginagana ani au gigugugaiyena. E ada anaetowava anafaiweya kiveuloulolo lakaina ada nuwavita gina nuwagana, faina aseasena wagaine wa yana nuwalaka givona, 'Iyayeku ani kwini, ada veimeya anaebavetoga kaikaiwabuna wagaine gavetovetoga. Iya keke sikwa, ada keke meyameyaganina tamo nuwavita lakaina gana lutovoni. Keke-mowa!'

- ⁸ Taidei anafaiweya yana dewa faina, ya-dayada seya-moena wagaine anavita koyomoedi in lakayegemona bana wagaine, alika, nuwavita lakaina, ada loka lakaina. Ada kaduwe ai ginaalai-yabuna. Faina Yaubada ani Totoyogi-vagaina, Banae-nai fatana gisena yana dewa koyona faidiya."

Taide anafaiweya bonabona-nai yana vona.

⁹ Aku babi anakini-dina moyaidi inaunau vavine-nai nodi vovodi iawaage-kavokavovona, kadu yana kaikaiwabu imiyamiyanena ke nuwadi givaina, ani bana gina alaalaina aku siyona-nai gilakalaka inaitana wagaine inatagiya. Ee, inatagi donadonau bana faine.

¹⁰ Bana anakivekoyo anauloulolo gina kivematausidi e ada inamididi atuwadeya inavona,

"Nuwakalikali! O Babiloni melala toyogi wa ayegana lakaina!

Kauwana anabai seya-moena wagaine, fata koyona giyegemona ya koyona ugugugaiyedi faidiya."

¹¹ Aku babi anakalivayavo ifaifaisewa lokoloko anavekimone wagaine ani itagiya ada inuwavita lakaina melala-nai faine, faina keke tamo gaito yadi lokoloko kaduwe gina kimokimoned.

¹² Keke ina kimone yadi gola, siliva, kabala lunamanamalidi fatadi lakaina, bidi fatana lakaina, kaleko iwaka-vagaidi, kaleko kwayakwayadi ada yabeyabelidi, silika, ai tulidi tulidi magadi iwakadi, gaitoma iwaka-moedi tulidi tulidi ibubudi kevakeva elefaniti aladi wagaidiya, kadu gaitoma tulidi tulidi ibubudi ai fatadi lakaidi, kopa, ayani, ada kabala kwakwana velemoena ivewagana 'mabolo' ani wagaidiya.

¹³ Ada kaduwe tufona lokoloko anafaiweya aa anakivedivedigaga tulina tulina, naiya, inisenisi, bunama iluwei fatadi lakaina ivewagadi falanikisenisi ke mulo, kadu waini, bunama olive, falawa fatana lakaina, witi, bulumakau, sifi, osi, ada salioti. Taide yadi lokoloko. Ada kaduwe ani kaliva ke vevine ivevekimoneyedi ke mali kaliva wagaidiya ina vetogugai yogoyogodi. Taide gaitoma-dina matatabuna ani keke kaduwe ina vekivekimone.

¹⁴ Ada babi anakalivayavo ifaifaisewa lokoloko anavekimone wagaine, ani ina mididi ada inavona Babiloni wagaine, ina vonaga, "Lokoloko-dina iwakadi nuwanuwa lakaina ani matatabu-moedi bademowa iavaidi. Ya kaikaiwabu matatabuna kadu ya gaitoma-dina ebanuwayaudi ani bademowa ibwavi. Ada aimo keke meyameyaganina inavai-vagile."

¹⁵ Ada badi gaitoma-dina moyaina ivevekimoneyedi melala-nai lakaina wagaine

ke ivekaikaiwabu ani ina mididi atuwadeya, faina anauloulolo gikivematausidi. Wa yadi nuwavita lakai-moena ina tagiya toyogina

¹⁶ ada inavona,

“Nuwakalikalina, Babiloni melala wa anayegana lakaina!

Tuwaina giveigavuyena nuya kwayak-wayana iwaka-vagaina, pepolo, ada yabeyabelidi.

Vovona giveigavuna gola ada kabala luna-manamalidi ke bidi fatadi lakaina wa-gaidiya.

¹⁷ Aku kauwana anabai seya-moena wagaine kaikaiwabu-dina taidei matatabuna iayavula!”

Aku badi tovmadu waka lakaidi ivevemadudi ada waka anakuluyavo, kadu badi toyage ada badi mani ivaivaina yadi gugai-nai leyaga wagaine, ani matatabudi imididi atuwadeya,

¹⁸ ada melala-nai gialaalaina aku badi siyona-nai gilakalaka iitana wagaine, ikova ivona, “O, keke tamo gavamelala lakaina anafaiweya taidei melala-nai wa anayegana lakaina, keke-mowa!”

¹⁹ Ada yadi nuwavita lakaina faina, avu wagaine kuluwadi itavudi ke itagi mogatala ivona,

“Nuwakalikalina, Babiloni melala lakaina wa anayegana!

Moyaidi wa yadi waka lakaidi leyaga wagaine ani ivetokaikaiwabu melala-nai yana vekaikaiwabu wagaine,

aku kauwana anabai seya-moena wagaine
melala-nai iluyavulena!

²⁰ E ada migabama wana vemwamwala!

Kadu imi Yaubada yana kaliva tabutabu-
miyavo ada afositoloyavo ke falofitayavo,
ani wana vemwamwala-mowa!

Waitana, gaitoma-dina koyodi Babiloni gigu-
gaiyedi wagaimiya faina,

Yaubada giveimeya ke givemataavulogina
analaufata faine.”

²¹ Taide ifufu-nai giavaina, anelose totoyogina
kabala lakaina gikilakaina ada gisegeobuyena
leyageya ada givona,

“Kabala-nai wa yaku toyogina gabatuge giobu
leyageya anafaiweya,

taide melala-nai Babiloni wa anayegana ani
au wa yadi toyogina ina batuge ginaobu,

ada keke kaduwe kanaita-vagile.

²² Melala lakaina taidei yana
ebavemwamwala gina avaina.

Api bonana, lololi bonana, kulele bonana,
kaula bonana, moyaidi keke-mowa kadu
kana nogali-vagiledi.

Tonuwauya gaitoma tulina tulina ibubudi
ani keke kadu kanaita-vagile.

Witi anaebaifuwa anakabala lakaina bonana
ani keke kadu kana nogali-vagile.

²³ Mayale yana malina melala-nai gituituima-
lina ani keke kadu kanaita-vagile.

Badi tonagi evagudi wa yadi vemwamwala
iifufufu ani keke kadu kana nogali-vagiledi.

Ee, Babiloni anavematavuloga ani taide anafaiweya, faina yana tovekimone kaikaiwabudiyavo ani badi babi matatabuna anakaliva lakaidiyavo, ada kaduwe anavematavuloga anafaiweya, faina anakalivayavo ani tova moyaina aluwaluwa koyodi yadi toyogina wagaidiya gugai meyasidobodobo ifaifaisewadi, e ada kaliva adiyoo babi anafafali tulina tulina wagaidiya ani moyaidi ifwayanegenegedi.
²⁴ Ada melala-nai Babiloni wagaine ani dayaga gimadu, taine Yaubada yana falofita ada yana kaliva tabutabudi dayagidi. Ee, kaliva-dina babi matatabuna wagaine imunudi ialika ani matatabudi vaita dayagidi Babiloni wagaine gidamadu, e ada taide koyona-nai lakaina anavita gimiyamiya Babiloni anakaibe wagaine.”

19

Migabama yadi awadavadava anakweli Yaubada faine.

¹ Aku Babiloni anakivekoyo muline, yoo lakai-vagina bonadi lakai-moena gabameya ganogalina ikovakova,

“KAUVEYA kana awadavadavana!
Yada Yaubada kana kikirakaina, Banae gik-ibababaleda!

Banae wa yana toyogina gimiyamiya yana iwakana mamalina wagaine.

² Faina yana vevonayavuga anaveimeya ani nuwanuwa velemonoena wagaine kadu tunutunugina.

Faina Babiloni vavine-nai sedasedadana valeyana lakaina ani Yaubada givevonayavugina, banae vovona anaawaega-kavokavovo wagaine babi gikivekoyona, ada Yaubada yana togugai dayagidi gikivemaduna. E ada malinai Yaubada gilufata mine-nai wagaine ke analaufata koyo-moena givelena yana dewa koyodi faidiya.”

³ Taide anafaiweya ivona aku ikova-vagila ivona,

“KAUVEYA kana awadavadavana!
Siyo keke maita gina ilova Babiloni gilaalaina wagaine,
au gilakalaka-vagata, keke gida avaavai.”

⁴ Ada tomiya gabama aditonagona tuweniti-fowa ada gabama anagaitoma-dina wayawaidiyavo adilaufuli iiboula-mowa ada ioduodu Yaubada wagaine, Banae givetovetoga veimeya anaebavetoga kaikaiwabuna wagaine. Ivona,

“Ika anafaiweya! Yaubada kana davana!”

⁵ Aku bonabona giyegemona veimeya

anaebavetoga-nai wagaine, givona,

“Imi gavega Yaubada yana togugai
wa yami matauta wavemoimoinena ani
wana davadavana.

E, imi lakaimiyavo kadu kabisomiyavo,
anayegana wana kilakaina.”

⁶ Taidei anafaiweya givona aku bonabona
lakaina ganogalina vaita yoo lakai-vagaina
bonadi lakai-moena anafaiweya. Ananogala
vaita wayagata gida lunununuga kadu atala
gida luluwatala moyali-moena anafaiweya.
Ivonavona,

“Yaubada kana davana! Faina Banae KAU-
VEYA yada Yaubada giveiveimeya, Banae
Totoyogi-vagaina.

⁷ Kana vemwamwala ke kana gakaikai
ada wa yada vemoimoina anayegana
kana kikilakaina,
faina Banae Lami ani yana nagi anatova
bademowa giyegemona,
ada yana vavine** bademowa tauna
gikidewedewena.

⁸ Ee, Yaubada vavine-nai gikivelaubodana
ke kaleko iwaka-vagaina wagaine tauna
gina veigavuna. Kaleko-nai ani kwayak-
wayana, mamali-moena, kadu yegayega-
vagaina.”

** **19:7** Bana vavine ani vonaluvefosa Mesaiya yana yoo tovetu-
magana wagaidiya.

Au taide anafaiweya yoo-nai lakaina ivona.
Ee, aku taine kaleko kwayakwayana-nai
anaalamana ani Yaubada yana kalivamomo
tabutabudiyavo yadi gugai yegayegadi.

⁹ Aku bana anelose givoneku, givona,
“Una vetokiluma taidei anafaiweya. ‘Gavega
Banae Lami yana nagi anakani wagaine
inuwabiyedi, Yaubada gina awanuwakabubuyedi.’
Kadu givona, ‘Taidei vona-dina ani Yaubada yana
vona velemoena.’ ”

¹⁰ Ada wa yaku vemoimoina nodi gaiboula-
mowa agene evona vaita gana oduodu bana wa-
gaine aku givoneku, givonaga, “Keke una gugaiye!
Iya au Yeisu yana togugai anafaiweya oyeni kadu
tubuiyamomo ke novumomo, imi waabidonau
Yaisu yana vona velemoena wagaine. Yaubada
Banae anakaibe-gagana una oduodu wagaine.”
Faina badi gavega iawatalatalainena Yeisu yana
faisewa yawaidi wagaidiya ani wada vaita falofi-
sai anafaiweya. Kaliva yadi vetumagana ikikive-
toyogidi.

Osi kwayakwayana anatoyage.

¹¹ Aku anelose giifuifufu giavaina, matakú gi-
laka ada gabama gaitana giayavuna. Ada osi
kwayakwayana gimidimididi aku kaliva give-
tovetoga osi-nai wagaine. Kaliva-nai anavaleya
ani Banae Toidibumwaiga kadu Tovona Vele-
moena. Ada tova-nai kaliva gina vevonayavugidi
ke fatadi ginasena yadi dewa koyodi faidiya,
ada tova-nai nibainavo gina lugaviyadi, wada
tunutunugina ada analauboda anafaiweya.

¹² Matana vaita aiyabeyabela meyana anafaiweya ada kuluwana wagaine kini adikedukedu kaikaiwabuna moyaidi imiyamiya. Kadu Bana wagaine yegana vetovetokilumina gimiyamiya, yegana-nai keke tamo gaito gida alamane aku Bana Tauna anakaibe gialamanena.

¹³ Ananuya luveyalilina giveigavuyena ani dayaga wagaine iutuvina, ada yegana-nai iveyeganina wagaine ani 'Yaubada yana Vona'.

¹⁴ Ada Bana wai ginagona, aku gabama anatolugaviya adiyoo moyai-vagaidi wai imulina. Badiyavo ani seyana seyana osi kwayakwayana iyagena, ada yadi veigavu ani kaleko iwakavagaidi, kwayakwaya-moedi ke yegayegavagaidi.

¹⁵ Aku Bana awana wagaine benisi manimaninina giyegemona, e ada yoo tulina tulina imiyamiya babi anafafali moyaidi wagaidiya ani taide benisi-nai wagaine gina munumunudi, taine badi gavega idibusoyogena. Banae yana veimeya toyogimoena wagaine kaliva gina veiveimeyedi. Gileifi anaebavagafuwa wagaine-deya gileifi vutodi gimadumadu anafaiweya, Banae Vona-nai ani Yaubada Totoyogi-vagaina yana nuwakoyo lakaimoena anamanini gina etoyavu gina madumadu.

¹⁶ Ada ananuya luveyalilina ubuna anafafali wagaine yegana ivetokilumina gimiyamiya. Yegana-nai taidei anafaiweya.

KINIYAVO YADI KINI ADA
KAUVEYAYAVO YADI KAUVEYA

17 Aku anelose seyana gaitana gimidimididi kauwana wagaine, ada givedou bonana lakaina manuga matatabuna wagaidiya mwatuguya iyaveyavega, givona, "Wanaelai! Wana vagauta Yaubada yana kanibutu lakaina faine!

18 Moyaimi wana vagauta e ada kaliva-dina ina alika gaviya wagaine, ani vidodi wana kanidi. Wana kanidi kiniyavo vidodi, ada tolugaviya adi-tonagona vidodi, kadu tolugaviya toyogidi vidodi, kadu osi ke aditoyage. Ee, kaliva moyaidi vidodi, badi togugai yogoyogodiyavo kadu badi keke yogoyogodi, ada badi adiyegana kabisodi kadu badi wa adiyegana."

19 Taide anafaiweya ganogalina aku matakū gināu ani kevakeva-nai koyo-moena manimaninina, kadu babi anakiniyavo wa yadi tolugaviyayavo adiyoo moyai-moedi gaitadi. Nodi ivagauta seyana ke Bana osi kwayakwayana anatoyage wa yana tolugaviyayavo ina lugaviyadi.

20 Aku Bana osi anatoyage wa yana tolugaviyayavo nodi ivetoyogina ada kevakeva-nai koyo-moena[†] kadu falofita-nai fwayafwayana ikiabidi. Taide falofita-nai kevakeva koyo-moena yana tovegugai anafaiweya, nagona gugai ebameyasidobodobo givevefaisewadi e ada kaliva gifwayadi ke kevakeva lakaina manimaninina yana talakili ivaina, kadu anakilumina wagaine ioduodu. Au adiselu, bana falofita fwayafwaya ke kevakeva-nai koyo-moena ani wayawaidi isegeobuyedi lavu-nai gialaalata salufa wagaine.

[†] 19:20 Ive 13:1-18

²¹ Aku yadi tolugaviya moyaidi ani alika inuwagana Bana osi anatoyage yana benisi wagaine, benisi-nai giyegemona awana wagaine. Aku au ialika-yabu, ada manuga moyaidi iela vidodi ikani-deeya bademowa adifata.

20

Anelose giobuelai ke Seitani giyogona ada gimiya malamala wani tausani (1,000).

¹ Aku aimo matakú gináu ani anelose seyana gaitana wagabameya-deya giobuobuelai, ada olu keke wa anaebalauyabu anaki kadu seini lakaina nimana wagaine.

² Giobuelai ada umala koyo-vagaina wa ofana[†] gikiveyabina, bana kadu mota-nai bade tuwaina-deya gimiyamiya, banae ivewagana toveloi-kavokavovo, kadu Seitani. Ada giyogo gina miyamiya malamala wani tausani (1,000).

³ Ada gisegeobuyena olu keke wa anaebalauyabu wagaine, anawana gifalina ada gilokana loka toyogina wagaine. Anelose-nai gidewa anafaiweya, e ada keke kaduwe Seitani babi anayoo moyaidi gina fwayanegenegedi analaba malamala wani tausani (1,000) gina avaina. Aku aimo tova-nai taide malamaladina gina avaidi, gilubodana anelose-nai gina etoyavuna ke tova maufona yavuyavuna gina miyamiya.

⁴ Aku kadu akuvewala wagaine matakú gináu ani veimeya anaebavetoga gaitadi, ada kalivadina ivetovetoga wagaidiya ani badi Yaubada

[†] 20:2 Ive 12:9

vevonayavuga anafaisewa giveledi. Aku kaduwe kaliva aluwaluwadi gaitadi. Badi Yeisu Keliso yana nuwanuwa velemoena iifuifufuyena kaliva wagaidiya, kadu Yaubada yana vona kaliva ivevewaledi, ada taidei faina Keliso nibainavo kuluwadi ilugoloidi.[†] Biyavo-dina keke ida oduodu bana kevakeva-nai koyo-moena wagaine o kai ida oduodu kilumina wagaine, kadu yana talakili keke idavai nimadi wagaine o kai debafoudiya. Badiyavo bade ialika aku iyawa-vagila ada malamala wani tausani (1,000) Bana Keliso nodi ivetoveimeya.

⁵ Taidei ani tova ehavevuvu-mowa Yaubada kaliva moyaidi gisiveyawadi alikeya, ada ivewagana 'yawa-vagila nagona'. Aku toalika velugadiyavo ani keke idayawa-vagila analaba malamala-dina wani tausani (1,000) giavaidi.

⁶ Badi gavega ina maduyawa-vagila ani Yaubada yana kaliva tabutabudiyavo, ada gina awanuwakabubuyedi. Biyavo-dina ani alika anavelu[†] keke maita wa yana toyogina ayo gina toyogitagodi, aku aiyada badi Yaubada ke Keliso yadi veyavo anatovegugai anaivi wagaine ina faifaisewa. Ada Keliso nodi ina vetoveimeya malamala wani tausani (1,000).

Yaubada Seitani gitoyogisegena ke anavematavuloga givelena.

⁷ Tova-nai malamala-dina wani tausani (1,000) gina avaina, anelose Seitani gina etoyavuna anadeli wagaine.

[†] 20:4 Ive 6:9 [†] 20:6 Ive 2:11, 21:8

⁸ Ada gina yegemona ginanau yoo tulina tulina imiyamiya babi matatabuna anafafali moyaidi wagaidiya, ke gina fwayanegenegedi aku gaviya faina gina vagauwidi. Yoo-dina ivewagadi Gogi ada Magogi.[†] Adiyoo ani vaita taliya anamakama anafaiweya, keke adafaiweya kana veyawadi.

⁹ Ada babi matatabuna anafafali moyaidi wagaidiya-deya, biyavo-dina itauya inaunau Yaubada yana kaliva tabutabudiyavo ina lugaviyadi. Ada inau-deeya matatabudi iyegemo imidififina Yaubada yana yooyavo yadi ebaga, ada Yelusalema, wada melala-nai ginuwakabubuyena. Ada badi idamunu-yabudi, ani aiyabeyabela wagabameya-deya giobuelai ada gialai-yabudi.

¹⁰ Ada banae toveloi-kavokavovo, bana kaliva gifwayanegenegedi ani isegeobuyena aiyabeyabela ada salufa adilavu wagaine, wadedeku ke-vakeva koyo-moena kadu falofita fwayafwaya imiyamiya. Ada yadayada ke bogi wagaidiya uloulolo wagaine ina miyamiya-vagata ke vagata.

Yaubada toalika givevonayavugidi.

¹¹ Aku aimo akuvewala wagaine matakun ginau ada veimeya anaebavetoga lakaina kwayak-wayana gaitana, ada kadu Yaubada givetogana wagaine gaitana. Ada Banae gimiyamiya faina, babi ada mwatugu ani vaita ida osena, aku keke tamo fafali gida miyami faidiya ke inaota.

¹² Kaduwe badi gavega ialika gaitadi, imidimididi veimeya anaebavetoga-nai wadebaine, badi wa adiyegana lakaidi kadu

[†] **20:8** Isik 38:2, 39:1

badi keke wa adiyegana lakaidi. Ada anelose buki ivai iyavudi.† Kadu buki seyana iyavuna ani Yawai anaBuki.† Ada toalika yadi vonayavuga anaveimeya inuwagana gavana vetovetokilumina buki-dina wagaidiya. Gavana idewayena yawaidi wagaidiya ani vetovetokilumina buki-dina wagaidiya, ada adiveimeya inuwagana yadi gugai analauboda anafaiweya.

¹³ Ada gavega ialika leyaga wagaine imiyamiya, ani imidiyegemona veimeya anaebavetoga-nai kwayakwayana wagaine. Ada Alike ke Toalika Yadi Fafali kadu anafaiweya, badi gavega ialika ke wadedeku imiyamiya ani imidiyegemona veimeya anaebavetoga-nai wagaine, ada seyana seyana gavadewa igugaiyedi, ani taide wagaine adiveimeya inuwagadi.†

¹⁴ Ada Alike ke Toalika Yadi Fafali ani ivai isegeobuyedi aiyabeyabela analavu wagaine. Lavu-nai giyaabeyabela ani alika anavelu kaliva ialialikena.

¹⁵ Ada kai gaito anayegana keke gida miyami Yawai anaBuki wagaine, aga isegeobuyena aiyabeyabela-vagata analavu wagaine.†

21

Gabama evaguna ada babi evaguna.

¹ Ada gabama evaguna ada babi evaguna gaitadi,† faina gabama nagona ke babi nagona

† 20:12 Dan 7:10 † 20:12 Ive 3:5 † 20:13 Mad 16:27 † 20:15 Mad 13:42,50 † 21:1 2Pi 3:13

ibwavi ada giavai matatabuyedi. Ada leyaga kadu keke-bamowa.

² Ada melala tabutabuna taine Yelusalema evaguna† ani gaitana, giobuobuelai Yaubada wagaine gabameya-deya. Anaita iwaka-moena vaita vavine yana nagi faina ikidewedewena anafai-weya, ada nagi anaveigavu wagaine iveigavuna moganena faine.

³ Ada bonabona lakaina ganogalina giyegeyegemona Yaubada yana veimeya anaebavetoga kaikaiwabuna wagaine, givona, “Wana itana, malinai Yaubada yana ebamiya ani kaliva nodi, ada Banae badi nodi ina miyamiya.† Badiyavo yana kalivamomo, ada Bana Tauna badi nodi ina miyamiya ke Banae yadi Yaubada gina miyamiya.

⁴ Matailudi seyana seyana gina luegegena matadi wagaine.† Ada keke aimo kaliva ina alialika† o kai ina nuwanuwavita, keke ina tagiya o kai ina uloulolo,† faina babi anagaitoma-dina tuwai-bulubuluna-deya imiyamiya ani bade inuvagata.”

⁵ Aku Bana givetogana veimeya anaebavetoga wagaine givona, “Una itana, malinai gaitoma matatabuna Iya gakikive evagudi.” Ada kaduwe givoneku, givona, “Una vetokilumidi gaitoma-dina malinai gavonayedi, faina taidei ifufu-nai ani velemoena ada wa anavetumagana.”

⁶ Kaduwe givoneku, givonaga, “Au bade-mowa! Yaku nuwanuwa matatabuna bade

† 21:2 Ive 3:12 † 21:3 Vei 26:11-12 † 21:4 Ive 7:17 † 21:4 Ive 20:14, 1Kol 15:26 † 21:4 Ais 35:10, 51:11

galuyabudi. Iyayeku ani Alefa ada Omega, ebavevuvu ada ebalauyabu.† Gaito meyana gikwakwa, gana veyuna yawai anagufa anatovoga wagaine, gufa-nai keke wa fatana.†

⁷ Badiyavo Iya faikuya ina vetoyogina ani taide gaitoma-dina gana veledi. Ada Iyayeku ani badi yadi Yaubada, ada badi Iya natukuweyavo.

⁸ Aku badi gavega imatauta akuyegana ina waiwaina, kadu badi gavega keke ida vetumaganeku, ada badi gavega yadi dewa bwanebwanebwanenedi, ada badi gavega kaliva iluluvealikadi, ke badi gavega vovodi iawaawaenge-kavokavovodi, ada badi gavega kweli tulina tulina iabiabina kadu badi gavega ibogabogavu,** ke badi gavega aseasediya ioduodu mali yaubadayavo wagaidiya, ada badi gavega ivefwayafwaya, ani matatabudi inana ina miyamiya-vagata lavu-nai ai ke salufa ialalata wagaine. Tainei ani alika anavelu." Taide anafaiweya Yaubada yana vona.

Yelusalema evaguna anaita anaawaluvaluva.

⁹ Aku anelose-dina adiseveni wagaidiya ani seyana gielai wagaikuya. Badi anelose-dina ni-madiya nauwa-dina imaga uloulolo vita-moedi wagaidiya. Taine uloulolo-dina ani uloulolo vita-moedi adiseveni wai imulina. Ee, anelose-nai

† **21:6** Ive 1:8 ke anaailabama ebakivemala † **21:6** Iyo 4:10, 7:37 ** **21:8** Taide dewa-dina anafaiweya bogavu, welavi, kiyogoyogo, ani keke ida miyami Yaubada yana ebaveimeya wagaine, ada badiyavo taide dewa-dina idewadewayedi ani faidiya Yaubada givona taide maita-nai wagaine.

giela givoneku, givonaga, “Unaela gana vewaleni vavine tonagi, Bana Lami vavinena.”

¹⁰ Ada Aluwaluwa Tabuna wa yana toyogina gielai wagaikuya aku anelose-nai givaiku gilakaveku oya tulatulana lakaina wagaine, ada melala tabutabuna Yelusalema givewaleku, giobuobuelai gabameya Yaubada wagaine gabameya-deya.

¹¹ Melala-nai wagaine ani Yaubada yana iwakana mamalina gimiyamiya, ada yana malina ani lunamanamalina vaita kabala fatana lakaina ivewagana yesipa anafaiweya, ada mamalimoena vaita kelasia anafaiweya.

¹² Aku anakali ani tulatulana ke toyogina, ada melala gibalawalilivugina. Ada kali-nai wagaine anawana tuwelo, ada wana seyana seyana wagaine anelose seyana gimiyamiya, adiyoo tuwelo. Aku wana-dina wagaidiya yegana ivetokilumidi imiyamiya, taine Isileli natunavo adituwelo unumidi adiyegana. Yegana seyana gimiyamiya wana seyana seyana wagaidiya.[†]

¹³ Kali-nai ani kauwana ebalakavine anafafali wagaine wana toiye imiyamiya, wayavalaseya anafafali wana toiye, wabolimaneya anafafali wana toiye, ada kauwana ebaolune anafafali wana toiye.

¹⁴ Ada melala-nai anakali anaavutuwa ani kabala adiyoo tuwelo,[†] ada kabala-dina wagaidiya ani Bana Lami yana afositoloyavo adituwelo adiyegana imiyamiya.

¹⁵ Ada banae anelose-nai giifufu wagaikuya ani aiwala ebaetowava gola gikiveyabina ke melala

[†] **21:12** Isik 48:31-35 [†] **21:14** Ibel 11:10

lakaina gina etowavana, kadu anawanayavo ke anakali.

¹⁶ Ada melala anavemanawe ada anavelalafa ani au seya-moena, ada anatulatula kaduwe seyana, sitediya tuwelo tausani anafaiweya.**

¹⁷ Kaduwe anakali gietowavana, ada anatulatula ani kiubiti wani analedi foti fowa (144).** Anelose gietowavana ide kaliva adaetowava anafaiweya.

¹⁸ Kali ani kabala fatana lakaina ivewagana yesipa wagaine ibubuna, aku melala lakaina ani ibubuna gola yegayega-vagaina wagaine, vaita kelasi mamali-moena anafaiweya.

¹⁹ Aku melala anakali anaavutuwa ani iveiveigavuna kabala fatadi lakaidi moyaidi tulina tulina wagaidiya, anaita iwaka-vagaina. Avutuwa anakabala nagona wagaine iveigavuna ani yesipa, bana anakala yabeyabelina ke yagoyagona aku vaita kelasi mamali-moena anafaiweya. Kabala anavelu ani safaiya, bana anakala matamatagina vaita gabama anamatamataga anafaiweya. Kabala anaveto ani agate, bana anakala tulina tulina. Anavelaufuli ani emeladi, bana anakala matamatagi-moena.

²⁰ Anavefaifi ani onikisi, bana yabeyabelina ke kwayakwayana nodi seyana. Anavesikisi ani keneliani, bana yabeyabelina. Anaveseveni ani kilisolaiti, bana yagoyagona. Anaveeita ani beleli, bana matamatagina vaita gawana

** **21:16** Etowava-nai 'sitediya tuwelo tausani (12,000)' ani vaita kilomita 2,200 anafaiweya. ** **21:17** Etowava-nai 'kiubiti wani analedi foti fowa (144)' ani mita sikisiti faifi (65) anafaiweya.

anaita anafaiweya. Anavenaeni ani tofasi, bana yana yagoyago gilunamanamalena. Anaveteni ani kulisofelesi, bana yana matamataga gilunamanamalena. Anaveileveni ani yiyasito, bana anakala vaita gawana bowabowa-moena anafaiweya. Ada anavetuwelo ani ametisi, bana pepolo.

²¹ Ada wana tuwelo-dina seyana seyana ani au bidi seyana lakai-moena wagaine ibubuna, ivewagana 'pelo',** ada vewaga velemono. Ada melala anawai ani gola yegayega-vagaina wagaine ibubuna, vaita kelasí mamali-vagaina anafaiweya.

²² Aku melala-nai tabutabuna Yelusalema wagaine ani keke tamo manuwa tabu gadaita, faina Yaubada anakaibe Totoyogi-vagaina ada Banae-nai Lami ani melala-nai yadi ebamiya. Taidei faina badi taudiyavo ani anamanuwa tabu.

²³ Ada melala-nai anamalina ani keke kauwana o kai vaikoi wagaidiya-deya, aku Yaubada yana iwakana mamalina gituituimalina, ada Banae Lami ani vaita yana mayale anafaiweya.†

²⁴ Yoo tulina tulina moyaidi babi matatabuna wagaine yana malineya ina miyamiya, ada babi anatoveimeya lakaidi yadi kaikaiwabu ina alialiyena wagaine.

²⁵ Ada yadayada anamatatabuna wagaine anawana yavuyavudi ina miyamiya. Keke

** **21:21** Taidei gaitoma-nai ivewagana 'pelo' ani giyegeyemonona tova-nai makama mukumukuna kabiso-moena ginaluku kwame wagaine. Ada ginamiya ginamiya-deeya, au anaita iwaka-vagaina gina yegemonona. Ada bana wagaine ododo ke tagasafi ibububudi. † **21:23** Ais 60:19,20

ina falifalidi, faina melala-nai wagaine ani keke tamo bogi.

²⁶ Ada babi anakaliva adiyoo moyaidi ina elaelai melala-nai wagaine, yadi kaikaiwabu ina alialiyedi ke wagaidiya Yaubada ina vemoimoinena.

²⁷ Aku gavagaitoma o kai gavakaliva o vavine keke tabutabuna aku Yaubada matane keke yegayegana, ani keke-bamowa ginaluku wad-edeku. Ada kaduwe badi gavega gugai ebavovomumu koyodi igugugaiyedi o badi gavega yadi dewa vefwayafwaya, keke inaluku melala-nai wagaine, keke-mowa.[†] Aku badi yawai-vagata bade inuwagana ke adiyegana vetovetokilumina Lami yana buki[†] wagaine, ani badiyavo gagana adiawaega inaluku. Buki-nai ani Yawai anaBuki.

22

Yawai anagufa.

¹ Aku anelose givewaleku yawai anagufa, yegayega-moena ada vaita kelasi gilunamanamalena anafaiweya. Gufa matana ani giyegeyegemona Yaubada ada kaduwe Banae Lami yadi veimeya anaebavetoga wagaine.

² Ada gimadu giobu melala-nai Yelusalema anawai nefanine, ada gufa-nai fafalina fafalina ani yawai ana ai gimidimididi. Ai taidei vaikoi seyana seyana giveveguwa e ada malamala seyana seyana yana veguwa ani tuwelo. Ada lukuna wagaidiya babi matatabuna anakaliva adiyoo moyaidi kivebwaina ina nuwanuwagana.

[†] **21:27** Ais 35:8, Iyol 3:17, 1Kol 6:9-10, 2Pi 3:13 [†] **21:27** Ive 3:5

³ Melala-nai wagaine kai gaito o kai gavana Yaubada ginuwenuwena vaita wa yana koyona e ada yana alatabutabu dibune gimiyamiya, ani keke ina miyami melala wagaine, keke-mowa. Ada Yaubada ke Banae Lami yadi veimeya anae-bavetoga kaikaiwabuna gina miyamiya melala wagaine, ada wadedeku Yaubada yana togugaiyavo ina oduodu wagaine.

⁴ Badiyavo Bana magigina ina itana, ada anayegana ani debafoudi wagaidiya.

⁵ Ada wadedeku bogi anatova keke kaduwe gina yegemona aku Kauveya Yaubada Tauna yadi malina gina miyamiya,[†] e ada mayale yana malina ada kauwana yana malina keke kadu ina nuwanuwa faine. Ada badi gavega imiyamiya melala-nai wagaine ani ina veiveimeya-vagata ke vagata.

Yeisu ginayewa-vagilena.

⁶ Aku anelose givoneku, givona, "Taide vona-dina ada gavana uitadi ani velemono, ada imi kaliva amifaiweya wana vetumaganedi. Kauveya Yaubada, Banae yana falofitayavo aluwaluwadi yadi Yaubada, ani yana anelose giimilina ke yana togugaiyavo gina vewaledi gaitoma-dina gilubodana tova kabisona ina yegemona."

⁷ Aku Bana Yeisu ani givona, "Wana nogalina. Iya gana maduelai! Buki taide wagaine gamatawe-vagaimi gaitoma-dina aimo ina yegemona faidiya. Imi gavega yaku vona-dina wagaidiya wakidonau ani Yaubada gina awanuwakabubuyemi."

[†] 22:5 Ais 60:19-20, Sek 14:6-9

⁸ Aku Iya Iyoni ani kaliva-kuna gaitoma-dina ganogalidi ke gaitadi. Ada tova-nai bademowa ganogalidi ke gaitadi, e au anelose-nai give-waleku ani agene gaiboula-mowa ke gada oduodu wagaine,

⁹ aku giawataku givona, “Auwe! Keke una gugaiye! Iya au Yaubada yana togugai anafaiweya oyeni ke tubuiyamomo badi falofita, kadu badi buki taidei anavona imulimuliyedi. Yaubada Banae anakaibe gaga una oduodu wagaine.”

¹⁰ Ada kadu givoneku, givonaga, “Falofisai anavona-dina buki taide wagaine, ani keke una sewavuye o kai una seliye gina miyami, keke. Faina taide gaitoma-dina ina yegemona aditova ani bademowa ivelilivana.

¹¹ Aditova-nai bade givelilivana faina, malinai badi gavega tova moyaina dewa koyona nuwadi givaina, aga aimo dewa-nai ina naunauwena. Badi gavega malinai tova moyaina wa yadi nuwa bwanene idewadewa, aga aimo kadu yadi dewa-dina bwanene ina naunauwedi. Kadu badi gavega malinai idewadewa yegayegana, aga aimo kadu yadi dewa yegayegadi ina naunauwedi. Ada badi gavega malinai Yaubada yana kaliva tabutabudiyavo, aga aimo kadu kaliva tabutabudiyavo yadi dewa anafaiweya ina naunauwena.”

¹² Aku Bana Yeisu givona, “Wana nogalina. Iya gana maduelai. Wa yaku laufata ganaelai ke kaliva seyana seyana gana fatana yana gugai gigugaiyedi anafaiweya, kai iwakana o kai koyona.

13 Iyayeku ani Alefa ada Omega. Iya wai ganago-moena ada wai gamuli-moena. Iya ebavevuvu ada ebalauyabu.” **

14 Badi gavega adinuya ikolakoladi Bana Lami dayagina wagaine,† ani Yaubada giawanuwak-abubuyedi. E ada gikivelaubodadi ke yawai ana ai guwana ina kanikanina ada inaluku melala tabutabuna anakali anawana wagaidiya.

15 Aku melala-nai wamelaleya ani kaliva koyodiyavo imiyamiya, badi kwelikweli tulina tulina iabina, ke badi tova moyaina vovodi iawaawaage-kavokavovodi, ada toluvealika, ke badiyavo yaubada fwayafwaya wagaidiya ioduodu, ada badi gavega vefwayafwaya anadewa inuwakabubuyena ke tova moyaina ivefwayafwaya.

16 “Iya Yeisu yaku anelose gaimilina ke gaitoma-dina faidiya gina matawemi, imi yaku kalivayavo babi matatabuna anafafali tulina tulina wagaidiya. Iyayeku ani Kini Deivida yana tubudelideli, bana yana yoo wagaidiya

** 22:13 Yaubada Tauna givewagana ‘Alefa’, ‘Banae wai ginago-moena’, ada kaduwe ‘Ebavevuvu’. Taidei adinuwanuwa seyana, ani ibuibubuna matatabuna Banae yana veimeya wagaine gibubuna. (Iyo 1:1-3) Ada kaduwe Tauna givewagana ‘Omega’, ‘Banae wai gimuli-moena’, ada ‘Ebalauyabu’. Ada adinuwanuwa seyana, ani Yaubada babi matatabuna anaebalauyabu wagaine gina veimeya kaliva seyana seyana faideya, gad-edeku-deya kana miyamiya-vagata wagaine. Banae ebavevuvu wagaine giveiveimeya, ada kadu yana veimeya ginanau-deeya, ebalauyabu wagaine. (Ive 1:8 ke anaailabama adiebakivemala, 1:17, 2:8) † 22:14 Ive 7:14 ke anaailabama adiebakivemala

gatubuyegemo, kadu Iya vaita malalavuga anaailabama gilunamanamalena anafaiweya.”

¹⁷ Aku Yaubada Aluwaluwana ke yana kalivamomo badi anafaiweya Bana Lami yana vavine-nai ginagina** ivona, “Unaelai!” Ada badi gavega ina nogalina, inavona, “Wanaelai!” Ada moyaidi gavega meyadi ikwakwa** ani idaelai. Badiyavo nuwanuwadi yawai anagufa ani idaela idavai-kavovona.

Iyoni givonamataweda buki taidei faina.

¹⁸ Aku imi gavega buki taidei yana vona wanogalidi ani Iya Iyoni gavonamatawemi. Gaitoma-dina aimo ina yegemona babi matatabuna wagaine ani Yaubada givonaye-vagaidi, ada buki taide wagaine imiyamiya. Ada kai tamo gaito tauna yana nuwanuwa gina vetutamwata buki taide anavona-dina wagaidiya, aga vita koyo-moedi gaawaluvaluvayedi buki taide wagaine ani Yaubada gina vetutamwaidi banae wagaine.

¹⁹ Ada Yaubada yana vona givonaye-vagaidi buki taidei wagaine ani kai tamo gaito tufona gina vaiyavuledi, aga banae anavutuga yawai ana ai wagaine ada yana ebamiya melala tabutabuna wagaine, ani Yaubada

** **22:17** ‘Bana Lami yana vavine-nai ginagina’ ani von-aluufosa, ada ananuwanuwa ani Yaubada yana yoo babi matatabuna wagaine, gavatoveya imiyamiya. ** **22:17** Von-a-nai ‘meyadi ikwakwa’ ananuwanuwa ani badi ilutovonina taudiyavo aluwaluwadi wagaidiya vaita nuwanuwadi lakaina yawai velemoena ina nuwagana, ani vaita meyadi gida kwakwa anafaiweya.

gina vaiyavuledi. Wada gaitoma-dina iluwei gaawaluvaluvayedi buki taidei wagaine.

²⁰ Aku Yeisu gaitoma-dina giawavelemoenayedi ani givona, givonaga, “Wana nogalina. Iya gana maduelai!”

Ika, Kauveya Yeisu, unaelai!

²¹ Imi Yaubada yana yoo tabutabumiyavo ani Kauveya Yeisu yana nuwadogeya gina lemelememi. Ika, anafaiweya.

Iyayeku Iyoni

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2